

Xujun xi kits'ínkjihí nda postru Pablo xuta nínku Roma

B'í ts'ín kikjaniñaha Pablo xuta nínku xi tjín nanki Roma

1 An Pablo, an nda musu síhin Jesucristo. Ntíaná kits'ín mana nku nda postruhú^a tū xi k'uenijmíhina én nda tsuhú, ²én nda tsu xi kitsú nga tsjá nk'ie nga kits'ínkinchja já profetaha xi nkú ts'ín tjít'a xujun éhen Ntíaná, kui xi tsje.

³Én nda tsuu tínchjanijmíyaha Ntíhi, kui xi Nda Ntíaná Jesucristo. Nk'ie nga yjoninte kik'a, ntjehe nda rei David nibaha ra. ⁴Ko nk'ie nga j'áiyaha ngabayoo, Espiritu Santo y'éjña chji nga kui xi Ntíhi Ntíaná xi tjíhin nga'yún. ⁵Kitsjana kjuanda ko kits'ín mana nku nda postru ngajoho tū xi tū má k'uenijmíhi ra xuta nga tjíhin nga s'ejihin ko kuint'é'éhen. ⁶Jun tintsubajiun xuta xi kis'enijmíhi, kui nga xutaha Jesucristo kamahanu.

⁷Ngayjoo xuta nínku xi tintsuboo nanki Roma títs'inkjínuu kui xujúin. Tjoho Ntíaná jun ko j'ájinnuu nga kikjats'enuu.

Kas'enuu kjuanda ko kjuajyu xi tsjáná Ntia Na'miná ko Nda Ntíaná Jesucristo.

B'í ts'ín kitsúya Pablo nga mjehe ngjuaisehe xuta nínku Roma

⁸Kui ni xu'bi xi tjun xínnuu. Tū ngat'aha nga Nda Ntíaná Jesucristo ts'ená, tsjaha máb'achjíhi Ntíaná ngat'aha nga ja kichjubó éhen ko nga ngúsuhun asuntee tichubanijmíyaha xi nkú ts'ín s'ejinnuu Ntíaná. ⁹Ngayjee animana títs'inxát'aha Ntíaná nga tíb'enijmía én nda tsuhú Ntíhi, ko kui xi be nga tehente ts'inkjónuu nk'ie nga nchjaka.

¹⁰Bankihí Ntíaná tsa kui xi mjehe katsjáníyána nga kama kfínsenuu. ¹¹At'aha mje nkjúnna skuenuu tū xi kúásinkohonuu nga sakúnuu ni xi tsjáná Espiritu Santo, tū xi ndjá kuinchahanu. ¹²Mjena nga xi nkú ts'ín nkuhú s'ejinná k'uai nga'yúnkoho raá xinkíá.

^a 1.1 “Xi kis'exá” tsuhú ra “nda postru” ko a ra “já postru”.

¹³Jun já nts'e, mjena nga choo nga nkjin niyá kama mjena nga kfínsenuu tunga santahá ni nd'ai tjin ni xi tíb'échjana. Mjena ta ts'ian xá xi kitsjána Jesucristo ajinnuu xi nkú nga ta títs'ian ajihin xuta naxinantá xingisoo. ¹⁴Tjihin nga ts'ian ajihin tu mí xutahá ni xá xi kitsjána, xuta xi nchja én griego ko xi nchja kj'ai én, xi nkjink'uhun ko xi najmi nkjink'uhun. ¹⁵Kui nga mangimjehena nga k'uenijmíhinuu ko ta jun xi tintsuoo Roma én nda tsuhu Jesucristo.

B'i ts'in kitsúya Pablo nga tjihin nga'yún én nda tsuhu Jesucristo

¹⁶Najmi ma subana nga én nda tsuhu Jesucristo b'enijmía, at'aha kui xi nga'yúhun Ntíaná xi ts'ínk'ankikooho ngayjee xi s'ejihin, xi ntje judio tjeheh ra ko xi najmi ntje judio tjeheh ra. ¹⁷Én nda tsuhu Ntíaná bakúchji xi nkú ts'ín Ntíaná tsjáha xuta nga naxu ma nginkun tu ngat'aha nga s'ejihin. B'a ma at'aha s'ejihin, xi nkú ts'ín jtít'a éhen Ntíaná nga b'i títsu: “Xi ja naxu nginkun Ntíaná tu ngat'aha nga s'ejihin k'úejna tík'un.”

B'i ts'in tsakúya Pablo nk'ie nga ngayjee xuta tjihin jé

¹⁸Ntíaná xi tijná nk'a ján b'éjña chji kjuqjahqan nga ts'in nibánehe ngayjee xuta xi najmi benkjúhun ko incha ts'in ni xi najmi naxu nginkun. Kui xuto xi b'échja nga cha ni xi naxu tjin. ¹⁹At'aha ni xi yahq Ntíaná, kui ta incha be. Ntíaná ta y'éjña chjihí. ²⁰Najmi tjin xi nkú ts'in b'a incha kuitsuhu nga najmi be. At'aha xi nkúhu nga kamanda asuntee tsakúchji nga'yúhun Ntíaná xi najmi maha ndyja ko nga nkuhú kui xi Ntíaná. Kjuaxi kjáihin nga najmi ma chji Ntíaná, tunga kamankjihinná tsa chaseéhe ni xi kin'enda.

²¹Tunga ta ndahá ni tsa incha kkie jóo ni xi ts'e Ntíaná, najmi incha kits'ínkie yjoho nga Ntíaná xi tjihin kjuachánka ko ta ndaha najmi incha kitsjáha máb'achjihí. Tu sa ní ni xi najmi chumi ni chjihí ra incha kits'ínkjink'un ko incha kama jyhín. ²²Já nkjink'un chuba incha kits'ín mahá yjoho, tunga já síhí incha kama. ²³Incha kits'ín t'axín kjuachánkaha Ntíaná, kui xi najmi maha 'me. Kits'intsjoho sénnistjihín xuta xi maha 'me ko sénnistjihín nisee, chu ko ye.

²⁴Kui nga Ntíaná kits'ín ndáihí ra xuto nga ni xi najmi ndoo incha ts'íihin, ni xi nchjaha animaha. Ta kui ta maha najmi incha kikienkjún yjonintehe nga ch'on kits'ínko. ²⁵Incha kits'ín t'axín éhen Ntíaná xi naxu tjin. Tu én tsank'óohó incha tsakj'á. Incha kikienkjún ko incha kits'intsjoho ni xi kin'enda antehe ni nga xi kits'ínnda niu ts'intsjoho, xi tjihin nga n'etsjoho tu nkjéhe ni. B'a tjin.

²⁶Kui nga Ntíaná kits'ín ndáihí ra xuto nga ni xi suba maná incha ts'ín. Jminchjihín jóo incha y'éntu xi nkú ts'ín tjeheh ra nga incha

ts'ínko x'ihin. ²⁷Já x'in ya ta incha y'éntu xi nkú ts'in tjeheñ ra nga incha ts'ínko jmichjún. Ta kuihi xinkjín x'in incha kits'in mje. Tjǐhin kjuasuba ni xi incha kits'in. Ta kuihi jáx'in incha kikjantuko xinkjín. Tunga ta incha kits'ínkjáíhín ra chjǐ xi tjeheñ ra kjuangasten xi incha kits'in.

²⁸At'ahañ najmi incha kits'ínsihin Ntíaná, kui nga Ntíaná kits'in ndaíhi ra nga kuatsúhun kjuankjink'uhun, tu xi incha ts'íhin ni xi najmi ma n'e. ²⁹Kui nga kitsejǐhin ra ngayje tǐkjá ni ch'onk'un. Najmi naxu incha ts'in, fantuko jminchjín xi najmi kjee bixan, incha fásihin ni xi tjǐhin xinkjín ko ch'on incha ts'in. Kitsejǐhin animahañ kjuaxintak'un, incha ts'ínk'ien xinkjín, ko ta kitsejǐhin kjuachán, kjuamaña ko kjuach'onk'un. ³⁰Nchjane xinkjín, én tsank'á ts'inne xinkjín, ts'in unkie Ntíaná, najmi ch'a benkjún, ma ngak'un, nk'a b'asje yjohó, kjuankjintak'uhun b'asjejin nkjin tǐkjá ni xi ch'onk'un, najmi nt'é'éhen xi cháha, ³¹si, najmi ts'íntjusun én xi nchja, najmi ch'a xi ts'íntjo, najmi ma n'e jnenta ko najmi ma nimahañ xinkjín.

³²Be xuta xu'bo nga xi b'a ts'íun ngabaya tjeheñ ra, at'ahañ b'a ts'in y'éjña Ntíaná. Tunga tu nku b'ahá tǐncha ts'in ko santaha tsjo incha mahá nga kj'áí xi b'a ta ts'in.

B'ǐ ts'in tsakúya Pablo nk'ie nga Ntíaná ts'ínkokjuá ngayjee xuta

2 Ji xi chaseihǐ yá xi nda ko yá xi najmi nda ko tǐn'ek'anji jé xuta xi kj'áí, najmi tjǐn nkú ts'in n'esjenkihini yjohǐ. Nk'ie nga chaseihǐ yá xi nda ko yá xi najmi nda, ta ji ta maha n'ek'anji jé yjohǐ, at'ahañ ji b'a ta n'ei. ²Yaá nga kixǐ ts'ínkokjuá Ntíaná xuta xi b'a ts'íun.

³Ji nda, ji xi chaseihǐ yá xi najmi nda tǐts'in ko nk'ie nga b'a ta n'ei, ¿a b'a bixín nga kuitjunkihi yjohǐ nga ts'ínkokjuahi Ntíaná? ⁴¿Á tǐn'e t'axíhín ri yjohǐ kjuanda chánkahañ Ntíaná ko nk'ie nga tu xǐ ts'in'yún tak'uhúnná ko nk'ie nga tu xǐ ndahá ts'in? ¿A najmi mankjǐhín ri nk'ie nga kui kjuandahañ Ntíaná tǐtsjǎniyáhi nga k'úínchj'ahañ ri animahi?

⁵Tunga tu ngat'ahañ nga ndjá tjǐyahi ko nk'ie nga najmi tǐ'michj'aihi animahi, tu sahá tǐn'etsenéí yjohǐ kjuá'un xi nibanehe asuntee nǐstjin nk'ie nga ts'íin nibá Ntíaná kjuakjahan ko ts'íin sisin kjuá. ⁶Nk'ie b'a kamoo, Ntíaná tsjáha chjǐhi nga nkúnkú xuta ngat'ahañ xi nkú tjǐn ni xi kits'in.

⁷Xuta xi tu nku tǐncha tǐts'íhín ni xi nda, xi b'a ts'in tǐbangisjǎhi nga sakúhu kjuachánka xi tsjá Ntíaná ko nga nda cha ko nga k'úéntu tǐk'un sín, kui xutahañ xi Ntíaná ts'ínk'íéntu tǐk'un síhín. ⁸Tunga xuta xi sin kjuá ko najmi nt'é'éhen ni xi naxu tjǐn, xi tu sahá nt'é'éhen ni xi najmi ndoo, kui xi incha ts'ínkjáíhín kjuá'un xi ts'íin nibanehe Ntíaná ko kjuakjahan.

⁹Kjuanima ko kjuaba sakúhu ngayjee xuta xi ts'ín ni xi ch'onk'un, b'aha ra xuta xi ntje judio tjeheh ra ko xi najmi ntje judio tjeheh ra. ¹⁰Tunga ngayjee xuta xi incha ts'ín ni xi ndoo, kui xi sakúhu kjuachánka xi tsjá Ntíaná, nda cha ko s'ehe kjuajyu, b'aha ra xi ntje judio tjeheh ra ko xi najmi ntje judio tjeheh ra. ¹¹At'aha namji ngabi ts'ín Ntíaná.

¹²Ngayjee xi incha kits'ín ngatitsun nga najmi be kjuatéxuma xi kin'ekj'asehen Moise, tu nkú ndyjahá ta ndaha tsa najmi kits'ínkokjuaha kjuatéxumoo. Ko ngayjee xi incha kits'ín ngatitsun nga ja be kjuatéxuma xi kin'ekj'asehen Moise, kui kjuatéxumoo ts'ínkokjuaha. ¹³Najmi xuta xi tu basínñjuhú ra kjuatéxumoo xi naxu ma nginkun Ntíaná. Xuta xi ts'íntjusun ní kjuatéxumoo xi naxu n'e ma.

¹⁴Xuta xi najmi ntje judio tjeheh ra najmi kik'aihi kjuatéxuma xi kin'ekj'asehen Moise tunga ts'íhín ni xi títsu kjuatéxumoo, at'aha mankjihin ni xi nda ko ni xi najmi nda. B'a ts'ín kuenta ts'e suba sakúhu ra nku kjuatéxuma, ndaha tsa najmi tíñaha kjuatéxuma xi kin'ekj'asehen Moise. ¹⁵Incha bakúchji xuto nga ajin animaha jtít'a ni xi bakúya kjuatéxumoo. Animaha tsuyaha tsa nda ko tsa najmi nda ni xi tíincha ts'ín. Ko kjuankjintak'uhun tsuyaha tsa tjeheh jé ko tsa najmi tjeheh ngat'aha ni xi tíincha ts'ín. ¹⁶B'a kama nistjin nk'ie nga Ntíaná k'uexáha Jesucristo nga kuasehe ni xi tíntu'máha xuta. B'a kama xi nkú títsu én nda tsu xi tíb'enijmía.

B'í ts'ín tsakúya Pablo nk'ie nga ta tjíhin jé xuta judio ndaha tsa kui kik'aihi kjuatéxumoo

¹⁷Ji xi b'a tíbixín nga ji xi ntje judio tjeheh ri, nga kjuatéxuma xi kin'ekj'asehen Moise kich'ai ko tsjo mahi at'aha Ntia nku tutuu s'ejihin. ¹⁸Yai ni xi mjehe Ntíaná nga n'ei. Yai má nihi xi nda at'aha kjuatéxumoo kisakúyahi. ¹⁹Behe tak'uin nga mahi baku niyáhi xuta ka ko nga ji xi nkú joyaha nku nd'í xi ts'ín ndzjehen xuta xi tjíma má jyuun. ²⁰Ji xi bakuyáhi xuta xi najmi be ni xi ts'e Ntíaná. Ji xi nda maestruhu xuta xi najmi mankjihin, at'aha tíñahi kjuatéxuma xi bakúchji kjuankjintak'uun ko ni xi naxu tjín.

²¹Ji xi bakuyái, ¿a najmi bakuyáha ri yjohi? Ji xi b'enijmí nga najmi ma n'e ndyjé, ¿a n'ei ndyjé? ²²Ji xi b'a bixín nga chankjáán kjuabixanná, ¿a b'a n'ei? Ji xi unchai ntia xi ntsja xuta ts'innda, ¿a najmi n'ei ndyjé ninkuhu ntia xu'bo? ²³Ji xi tsjo mahi at'aha yai kjuatéxuma xi kin'ekj'asehen Moise, tunga najmi tíyankjúní Ntíaná nk'ie nga tíbiyunéi kjuatéxumoo. ²⁴B'í títsu éhen Ntíaná má nga jtít'a: “Ngat'anuu najmi tíyankjún Ntíaná ajihin xi najmi ntje judio tjeheh ra.”

²⁵Chjǐhi ra nga kin'ehi circuncision tsa tín'etjusuin kjuatéxumoo. Tunga tsa tíbiyunéi kjuatéxumoo, circuncision xi kin'ehi b'a ma

xi nkúhu tsa najmi kin'ehi niu. ²⁶Kui nga tsa xi najmi kin'ehe ra circuncision kjuátjoho ni xi tjít'a kjuatéxumoo, ¿a najmi n'echjǐhí ra ni xi títs'ín nga chasehe xi nkúhu tsa kin'ehe circuncision? ²⁷Xi najmi kin'ehe circuncision yjonintehe tunga títs'íntjusuhún kjuatéxumoo, kui xi k'uéjñanehi ni xi kanéhi ji xi tíjñahi kjuatéxumoo ko kin'ehi circuncision tunga tíbiyunéní.

²⁸Najmi yjonintee tsuya yá xi judio, ko najmi ni xi n'ehe yjonintee xi circuncision xi ndoo. ²⁹Judio ní xi b'a ts'ín tjíyaha ko circuncision xi nda, kui ní xi ma ajin animaha xuta. Espirituhu Ntíaná b'a ts'ín, najmi ni xi tjít'a xujun. Xi b'a ts'ín tjíyaha, Ntíaná nda nchjanehe xuta xu'bo, najmi xuta.

B'ǐ ts'ín tsakúya Pablo nk'ie nga tu nkú naxuhú ts'ín Ntíaná

3 Kui b'a maha, ¿mí ni xi tjín saha xi ntje judio tjehe ra ni ma? ¿Ko má xi kui chjéhe circuncision? ²Chjǐhi ra niu, tu xi nkú ts'ín chasehé raá. Títjun Ntíaná kits'ínkjas'ehe xuta judio éhen. ³Tjín xi najmi kis'ejihín éhen Ntíaná, tunga, ¿a kuihí nihi xi ts'ín nga Ntíaná najmi ts'íntjusuhun éhen? ⁴Najmi! ¡Ndaha tsa mí yjehe! Ndaha tsa tsank'á ngayjee xuta, tunga Ntíaná tu nkú ts'ín ni xi naxu tjín. Xi nkú ts'ín tjít'a xujun éhen Ntíaná nga b'ǐ títsu:

S'ejña chji nga ji xi naxui nk'ie nga chubai,
ko n'e nanaí nk'ie nga n'ekokjuahi.

⁵Tsa kjuach'onk'unná b'ejña chji nga Ntíaná xi naxu ts'ín, ¿nkú kuixiáán ni ma? ¿A najmi naxu ts'ín Ntíaná nk'ie nga ts'ín nibájennená kjuakjahan at'aha ch'on k'aán? Nk'ie nga b'a tíxian, tíchja xi nkúhu nku nda. ⁶¡Ndaha tsa mí yjehe najmi b'a tjín! At'aha tsa najmi naxu ts'ín Ntíaná, ¿nkú ts'ín ts'ínkokjuaha xuta?

⁷Tunga tsa ngat'aha én tsank'á xi tíchja, ko tsa b'a ts'ín tísejña chjhi nga b'a tjín ni xi ts'ín Ntíaná ko sakú saha kjuachánka, ¿a b'a tíminaha ni ma nga ngatitsun títs'ian? ⁸Ka ma ra b'ǐ k'úhíhín xinkíá kai: “Ch'on n'eé tu xi nda kamaha asuntej.” B'a tíincha tsu xi tíincha nchjayaneni nga kui niu xi tíincha bakuyái. Nda tjín nga s'ejñanehe mí nihi xi kanéhe xi b'a tíincha tsuu.

B'ǐ ts'ín tsakúya Pablo nk'ie nga najmi tjín xi bichú ma naxu nginkun Ntíaná tu ngat'aha nga ts'íntjusun kuatéxumoo

⁹¿Nkú kuixiáán ni ma? ¿A 'yún nda sai jin xi ntje judio tjehe ni nga xuta xi najmi ntje judio tjehe ra? ¡Najmi! ¡Ndaha tsa mí yjehe! At'aha ja kuayaá nga xi judio ko xi najmi judio nkúhu ngatitsun tjíntujín. ¹⁰Xi nkú ts'ín tjít'a éhen Ntíaná nga b'ǐ títsu:

Najmi tjín xi naxu nginkun Ntíaná,

ndaha nku najmi tjín.

¹¹ Najmi tjín xi mankjihín,

najmi tjín xi bangisjai nga skue yáha Ntíaná.

¹² Ngayjee kindyjajihín niyóo,

nkuhú nga tsatsuhun animaha.

Najmi tjín xi nda ts'ín, ndaha nku najmi tjín.

¹³ Ngabaya y'aha ra ni xi tsu,

tú subahá én tsank'á nchja.

Én xi bitju ts'a b'a joyaha xáhan ye,

¹⁴ kitsehe ts'a én ch'on tsu kó én stinta.

¹⁵ Kítsa b'ema nga ts'ínk'ien animá,

¹⁶ ni xi incha ts'ín ts'ín x'áhan xuta kó kjuanimá tsjáha.

¹⁷ Najmi incha be má tjín kjuajyu,

¹⁸ najmi incha tjínjin tak'un

nga Ntíaná xi tjíhin nga chankjún.

¹⁹ Yaá nk'ie nga xuta xi tjíñanehe kjuatéxuma xi kin'ekjas'ehen

Moise, kjuatéxumoo tínchjakohó xuta xu'bo tú xi nk'ie nga kuasehe ra

Ntíaná mí nihi xi kits'ín xuta najmi tá incha kuínchjaha nga najmi tá

kuítjunkihi rá yjoho. ²⁰ At'aha ndaha nku najmi naxu cháha nginkun

Ntíaná tú ngat'aha tsa ts'íntjusun ni xi tjít'a kjuatéxumoo. At'aha tú

sa ní kjuatéxumoo b'éjña chjiná nga tjínná ngatitsun.

**B'i ts'ín tsakúya Pablo nk'ie nga tú
ngat'aha nga s'ejihín xuta Jesucristo
naxu bichú ma nginkun Ntíaná**

²¹ Tunga nd'ai ja y'éjña chji Ntíaná xi nkú ts'ín naxu ma xuta
nginkun. Najmi kjuatéxumoo xi maha b'a ts'ín. Santa níhi ma n'eya

nií ajihín xujun kjuatéxuma xi kin'ekjas'ehen Moise kó ni xi y'é'ta

já profeta. ²² Ngat'aha ní nga s'ejihín xuta Jesucristo, b'a ts'ín naxu

maha nginkun Ntíaná. Kó b'a maha ngayjee xi s'ejihín, at'aha najmi

ngabi ts'ín Ntíaná. ²³ Tú ngat'aha nga ngayjee xuta kits'ín ngatitsun,

ndaha nku najmi sakúhu kjuachánka xi Ntíaná tsjá.

²⁴ Tunga chánkahá kjuandaha Ntíaná xi tú títsjáhá nga naxu

kama xuta nginkun, at'aha Jesucristo y'échjintjai xuta kó kits'ín

ndaíhi jéhe. ²⁵ Kui xi Ntíaná kits'ín ma nku chje. Tsaténdzjo jníhi tú

xi sakúhuná kjuan'endyjat'a nk'ie nga s'ejinná Jesucristo. B'a ts'ín

tsakúchjhi Ntíaná nga naxu ts'ín. Nístjin nk'ie, tú ngat'aha nga

tsenta najmi kits'ínnijéhe rá xuta ngatitsun xi kits'ín. ²⁶ Tunga nístjin

nd'ai ja tsakúchji nga naxu ts'ín kó nga tú nku naxuhú títs'ín nk'ie

nga títsjáha xuta nga naxu ma nginkun tú ngat'aha nga s'ejihín

Jesucristo.

²⁷ Kui b'a maha, ¿a tjín nkú ts'ín kama nk'a n'esjehená yjoná

nginkun Ntíaná at'aha ngat'aha kjuatéxuma xi kin'ekjas'ehen Moise

naxu kamahaná nginkun? Najmi kama. S'ejña t'axín ni xu'bo tu ngat'aha nga s'ejinná Jesucristo. ²⁸At'aha mankjinná nga ma naxu xuta nginkun Ntíaná tu ngat'aha nga s'ejihin Jesucristo, najmi ngat'aha tsa ts'íntjusun ni xi tǐt'a kjuatéxumoo.

²⁹¿A tu nkuhú Ntíaha xuta xi ntje judio tjeheñ ra Ntíaná? ¿A najmi kohó Ntíaha xuta naxinantá xingisoo? Johon, b'a tǐn. Ntíaná ta Ntíaha xuta xi najmi ntje judio tjeheñ ra. ³⁰At'aha nkuhú maha Ntíaná xi ts'ín nga naxu ma xuta judio xi kin'ehe ni circuncision at'aha s'ejihin, ko ta tsjá nga naxu ma xuta xingisoo xi najmi kin'ehe ni circuncision tu ngat'aha nga s'ejihin. ³¹Kui nga, ¿a tǐn'endyaná chǐhi kjuatéxumoo tu ngat'aha nga s'ejinná? ¡Najmi b'a tǐn! Tu sa ní b'a ts'ín tǐ'baihi raá chǐ xi tǐhin kjuatéxumoo.

B'ǐ ts'ín y'ejña chubayahá Pablo nga kits'ínchjén ntje cháha xuta judio xi 'mi Abraham

4 Chubanímíyahaná ntje cháná Abraham. ¿Mí nihi xi kisakúhu? ²Tsa Ntíaná kits'ínkjáihin Abraham nga kui xi naxu tu ngat'aha ni nda xi kits'ín, ka ma ra nk'a k'uasje yjoho. Tunga najmi kamahá nk'a k'uasje yjoho nginkun Ntíaná. ³¿Nkú tǐtsu éhen Ntíaná ngat'a ts'e ni xu'bo? B'ǐ tǐtsu: “Kis'ejihin Abraham Ntíaná ko kui niu xi kits'ínchǐhi ra Ntíaná nga Abraham xi nku nda xi naxu.”

⁴Xi nkúhu xuta xi ts'ínxá, kui xi ch'axkihǐ ni xi ts'ín ko b'a ts'ín s'echǐhi ra. Najmi tu 'baihi ni xi ts'ínkjáihin. ⁵Tunga máha xuta xi najmi ma 'yún k'un ni nda xi kits'ín, nga tu sahá s'ejihin Ntíaná xi tsjáha xuta ngatitsuun nga naxu ma nginkun, Ntíaná be nga xuto s'ejihin ko kui niu xi b'axkihǐ Ntíaná nga naxu basehe.

⁶B'ǐ kitsú David nga: ¡Á b'a nda tǐhin ts'e xuta xi Ntíaná naxu basehe, najmi tu ngat'aha ni xi kits'ín tsa kui kjuaha nga naxu n'e ma! ⁷B'ǐ ts'ín y'ét'a:

¡Á b'a nda tǐhin ts'e xuta
xi kin'endyjat'aha ra jéhe,
ko kin'endyjajnuhu ngatitsuhun!

⁸¡Á b'a nda tǐhin ts'e nda
xi Ntíaná najmi b'axkihǐ ra ngatitsuhun!

⁹¿A tu nkuhú xuta xi kin'ehe ni circuncision sakúhu kjuanda xi tǐtsu David, a ra kohó xi najmi kin'ehe ni circuncision? Ja b'a kuixián nga Abraham kis'ejihin Ntíaná ko nga kui niu xi kin'echǐhi ra nga naxu kin'e ma. ¹⁰Tunga, ¿nkjé kin'echǐhi ra Abraham nga kui xi nku nda xi naxu? ¿A nk'ie nga ja kin'ehe ni circuncision, a ra nk'ie nga najmi kjehé n'ehe ni circuncision? Nk'ie nga najmi kjee n'ehe ni circuncision b'a kama.

¹¹Askahan kin'ehe Abraham ni circuncision. Kui niu xi kama nku chuba xi kis'et'aha, chuba xi tsuhu ra nga naxu kama at'aha

kis'ejihín Ntíaná nk'ie nga najmi kjee n'ehe ni circuncision. B'a ts'ín j'ai maha Abraham na'mihí ngayjee xuta xi s'ejihín Ntíaná, ndaha tsa najmi kin'ehe ni circuncision. Ntíaná b'axkihí xuta xu'bo xi nkúhu xuta xi naxu. ¹²Ko ta j'ai ma Abraham na'mihí xuta xi kin'ehe ni circuncision, xi najmi tu nkú ni circuncision kin'ehé ra, ko ní ta s'ejihín Ntíaná xi nkú ts'ín kis'ejihín ntje cháná Abraham nk'ie nga najmi kjee n'ehe ni circuncision.

B'i ts'ín tsakúya Pablo nk'ie nga kits'íntjusun Ntíaná ni xi kitsúya títjuhun Abraham

¹³Ntíaná kitsúya títjuhun Abraham nga kui ko ntje xi s'ehe askahan ts'ínkjáhín asuntee nga kama ts'e. Tunga najmi ngat'aha ní tsa kits'íntjusun Abraham kjuatéxuma xi kin'ekjas'ehe Moise, tsa kui kjuaha nga b'a kik'in títjuhun ra. B'a ní kik'ihín at'aha kis'ejihín Ntíaná ko kui niu xi kich'axkihí ra nga kui xi naxu. ¹⁴At'aha tsa xi t'íncha ts'íntjusun kjuatéxumoo, tsa kui xi ts'ínkjáhín ni xi kitsúya títjun Ntíaná nga tsjá, kui xi tsuhu ra nga najmi chumi ni chj'íhi ra nga s'ejihín xuta Ntíaná ko najmi ta chumi ni chj'í kamaha ra én xi kitsúya títjun Ntíaná. ¹⁵Nk'ie nga biyuné kjuatéxuma xi kin'ekjas'ehe Moise, kjuakjahan Ntíaná ts'ín nibánehe xuta. Tunga má najmi tjín kjuatéxumoo, najmi tjín xi nkú ts'ín kuiyúnehe ni xi títsu.

¹⁶Kui b'a maha, at'aha ní nga s'ejihín xuta Ntíaná, kui kjuaha nga sakúhu ra ni xi kichuba títjun, tu xi ngat'aha kjuandaha Ntíaná sakúhu ra ngayjee ntjehe Abraham ni xi kichuba títjun. Najmi tu nku xi y'aha ra kjuatéxumoo xi sakúhu niu. Ta sakúhu xi s'ejihín Ntíaná xi nkú ts'ín kis'ejihín Abraham Ntíaná. Kui xi na'miná ngatentéé ¹⁷nginkun Ntíaná xi nkú ts'ín tjít'a, má nga b'a kitsúhu Ntíaná Abraham: “Ji xi kits'in maha na'mihí nkjin xuta naxinantá.” Kis'ejihín Abraham Ntíaná, kui xi ts'ínk'íentu tík'un xuta k'ien ko tu ts'ínkjohó ni xi najmi kjee tjín, as'ai s'e.

¹⁸Abraham kikuyá ni xi kik'ihín ko kama na'mihí nkjin nkjún xuta naxinantá at'aha kis'ejihín Ntíaná, ndaha tsa najmi tjín xi nkú ts'ín kuitjusuhun niu. Kama xi nkú nga kik'ihín: “B'i ts'ín nkjin kama ntjehe.” ¹⁹Tu nkú kis'ejihín ra Abraham, ndaha tsa kamankjihín nga ja tu xi nibajehén ra yjonintehe at'aha ja ma kfehé ra unchan nú ko tsa ngat'aha nga ntí Sara xi chjuúhun maha. ²⁰Najmi jo jan kamaha tsa najmi ta kis'ejihín ra ni xi kitsúya títjuhun Ntíaná nga tsjáha. Tu sahá ndjá tsasinjña sa nga kis'ejihín ko kits'ínkie yjohó nga chánka Ntíaná. ²¹Y'énku k'un nga tjíhín nga'yún Ntíaná ko nga kamaha ts'íntjusun ni xi kitsúya títjuhun. ²²Kis'ejihín Abraham Ntíaná ko Ntíaná kits'ínchj'íhi ra niu nga Abraham xi nku nda xi naxu.

²³Má nga tjít'a nga Ntíaná kits'ínchj'íhi ra nga kis'ejihín Abraham, najmi tu nkuhú ngandaha Abraham kis'et'a niu. ²⁴Nganda níná

kis'et'aha niu. Ta n'echjíná kō nǎ xi nkúhu xuta xi naxu at'aha s'ejjinná Ntíaná xi kits'ínkj'áiyahá ngabayoo Nda Ntíaná Jesu. ²⁵Kui xi kin'ek'ienntjáihi ngatitsunná kō kin'ekj'áiyá ngáha rá ngabayoo tu xi ta kamahaná xuta xi naxu nginkun Ntíaná.

B'i ts'ín tsakúya Pablo nk'ie nga nd'ai tjínkoná kjuajyu Ntíaná

5 Kui b'a maha, naxu kamaá nginkun Ntíaná at'aha s'ejihinná Ntíaná kō tjínkoná kjuajyu ngat'aha ni xi kits'ín Nda Ntíaná Jesucristo. ²At'aha s'ejjinná Ntíaná, kui nga Jesucristo kits'íhin nga tsitjas'enjihinná kjuanda xu'bi. Ndjá tinchajián kjuandoo. Kui nga tsjo mahaná nk'ie nga tichuyáá kjuachánka xi tsjáná Ntíaná.

³Kō najmi tu nku ni xu'bi xi tsjo maná. Ta tsjo maná kjua'un xi tíbitjajíáán, at'aha yaá nga kjua'uun tsjá nga'yúnná tu xi n'e chúkjuahaná ni xi tímat'aán. ⁴Kō tsa n'e chúkjuá, kixi bitjukaá ni xi tímaná. Kō tsa kixi bitjukaá ni xi tímaná, ma chuyáá ni nda xi tsjáná Ntíaná. ⁵Kō najmi sakúná kjuasuba, ndaha tsa najmi kjee tíyaá ni xi tichuyáá. At'aha Espiritu Santo xi kik'ainá kits'íntsej'ihin animaná kjuatjoho Ntíaná.

⁶Nk'ie najmi kama kin'ek'anki subáá yjoná, Cristo k'ienntjáihi xuta ngatitsuun nistjin xi kitsú Ntíaná. ⁷Ni tjin tsa tjin xi kuayántjai nku xuta xi naxu ts'ín, tunga kutsa tjíhín xi kama k'un kuayántjai nku xuta xi 'yún nda. ⁸Tunga Cristohó k'ienntjái'ihiná nk'ie nga xuta ngatitsun saá. B'a ts'ín tsakúchj'ihí Ntíaná xi nkú ts'ín tjoho nǎ.

⁹Nk'ie nga ja xuta xi naxu kamaá nginkun Ntíaná ngat'aha jní xi tsaténdzjo Cristo, ¿nkú ts'ín najmi n'ek'ankihiná nistjin nga ts'ín nibájen kjuakjahan Ntíaná? ¹⁰At'aha nk'ie nga kamaá xuta kontraha Ntíaná, ngat'aha ngabayahá Ntíhi kinchjako ndaná. ¿Nkú ts'ín najmi n'ek'ankiná ngat'aha kjuatík'uhun Ntíhi, nǎ xi ja nchjako ndaná nd'ai? ¹¹Kō najmi tu suba ni xu'bi tichuyáá. Ta tsjo maná nga Ntíaná kjuáts'ená, at'aha Nda Ntíaná Jesucristo kits'ín nga tábichúk'un ngáha ráá Ntíaná.

B'i ts'ín tsakúya Pablo nk'ie nga Adan j'aiko ngabayoo tunga Jesucristo kits'ínk'íentu t'ík'unná

¹²Ngat'aha ni xi kits'ín nku nda ngatitsuun jas'en asunteei kō ngatitsuun j'aiko ngabayoo. B'a ts'ín ngjindjuhu ngabayoo ajihín ngayjee xuta, at'aha ngayjee xuta kits'ín ngatitsun. ¹³Kintehe ni nga Ntíaná kits'ínkj'as'eheh Moise kjuatéxumoo kis'e ngatitsun asunteei, tunga najmi ch'axkihí rá ngatitsun xi ts'ín xuta nk'ie nga najmi kjee tjin kjuatéxumoo. ¹⁴Yaha nk'ie nga nistjihín Adan santaha nistjihín Moise tsatéxuma ngabayoo. Ta k'ien xi najmi kits'ín ngatitsun xi nkúhu xi kits'ín Adan. Adan, kui y'éjña chubayaná xi kjuáá askahan.

¹⁵Kjuandaha Ntǐaná najmi b'a joyaha xi nkúhu ngatitsun xi kits'ín Adan. At'aha ngat'aha ngatitsuhun nku nda nkjin xuta k'ien, tunga ngat'aha kjuandaha nku nda, kui xi Jesucristo, nkjin xuta 'yún kisakúhu kjuandaha Ntǐaná ko ni xi tu kitsjáhá ra. ¹⁶Ko ni xi tu kitsjáhá Ntǐaná najmi b'a joyaha xi nkúhu ni xi y'aha ra ngatitsuhun Adan. Ngat'aha nku ngatitsun xi kits'ín Adan, Ntǐaná kits'ínnijéhe ko b'a ts'ín jé y'ejñajihin. Tunga askahán ni nga kis'e nkjún ngatitsun, tu kitsjáhá Ntǐaná nga naxu kama xuta nginkun. ¹⁷Ngat'aha ngatitsun xi kits'ín nku nda tsatéxuma ngabayoo, tunga ngat'aha ní nku nda, kui xi Jesucristo, incha k'úentu tǐk'un ko kuatéxuma xuta xi ts'íinkjáihin kjuanda chánkaha Ntǐaná ko k'uqǐhi nga naxu kama nginkun.

¹⁸Kui b'a maha, xi nkú ts'ín tu ngat'aha nku ngatitsun xi kits'ín nku nda jé y'entujǐhin ngayjee xuta, b'a ta ts'ín tu ngat'aha nku ni nda xi kits'ín nku nda naxu bichú ma ngayjee xuta nginkun Ntǐaná ko k'úentu tǐk'un. ¹⁹Xi nkú kama nga najmi kint'één nku nda ko kui nga nkjin xuta tsichu maha xuta ngatitsun, b'a ta kama nga kint'één nku nda ko kui nga nkjin xuta naxu kuichú maha nginkun Ntǐaná.

²⁰Ko ta j'ai s'ejña kjuatéxuma xi kin'ekjas'eheñ Moise tu xi saha ngatitsuun, tunga nk'ie nga ja kisá ngatitsuun, 'yún kisá sa kjuandaha Ntǐaná. ²¹At'aha xi nkú ts'ín kis'ehe nga'yún ngatitsuun ko j'aiko kjuabayoo, b'a ta ts'ín tjǐhin nga'yún kjuandaha Ntǐaná, kui xi ts'ín nga naxu mahaná nginkun ko ts'ínk'íentu tǐk'un sínná ngat'aha ni xi kits'ín Nda Ntǐaná Jesucristo.

B'ǐ ts'ín tsakúya Pablo nk'ie nga ja tsayahaá ngatitsuun ko nga tintsuba tǐk'unqaá Cristo

6 Kui b'a maha, ¿nkú kuixǐhinná? ¿A tu nku n'enáhá ngatitsun tu xi 'yún s'ejña chji saha kjuandaha Ntǐaná? ²¡Najmi! ¡Ndaha tsa mí yjehe! Ja tsayahaá ngatitsuun. ¿Nkú ts'ín kuǐntsubajin sahaná ngatitsuun? ³¿A najmi yanú ni xu'bi? Ngatenteé xi kusaténtájǐan Jesucristo nkuhú ja makaá ko nkuhú ja tsichu majihǐn ngabayaha. ⁴Nk'ie nga kusaténtájǐan Cristo, b'a ts'ín tsayakohóná ko kis'eyanjikaá, tu xi kuǐntsuba tǐk'un tsetse ngáhaná xi nkú ts'ín Ntia Na'miná kits'ínkj'áiyaha Cristo ngabayoo nk'ie nga tsakúchji kjuachánkaha.

⁵At'aha tsa nkuhú tsichu makaá Cristo nk'ie nga k'ien, b'a ts'ín ta nkuhú kuichú makaá nga kj'uaíya ngáhaná xi nkú ts'ín j'áíya ngáha ra ngabayoo. ⁶Yaá nk'ie nga kisut'a kruukaá Cristo. Najmi b'a ta ts'ín tintsubahaná xi nkúhu nk'ie. Ja tsatsun yjonintená xi tjǐnjǐhin ngatitsun tu xi najmi ta kuínú'yá'éheñ raá ngatitsuun. ⁷At'aha xi 'me, najmi ta tjǐn xi nkú ts'íihǐn ra ngatitsuun.

⁸Tsa ja tsayakaá Cristo, ta s'ejinná nga ta kuǐntsuba tǐk'unqaá. ⁹Yaá nga Cristo j'áíya ngáha ra ngabayoo ko najmi ta kuayá saha.

Najmi ta tjihin ra nga'yûn ngabayoo tsa nkú ts'ín saha. ¹⁰At'aha nk'ie nga k'ien Cristo, nkuhú niyá k'iehen tu xi kikjexihin ra nga'yûn xi tjihin ngatitsuun. Ngat'a ts'e nga tjiña tîk'un, tjiña tîk'un xi nkú ts'ín mjehe Ntíaná. ¹¹Ko máha jun, b'a ta ts'ín n'enkjintak'un nga ja tsayoho ngatitsuun ko tintsuba tîk'un xi nkú ts'ín mjehe Ntíaná, nga nkuhú makoo Jesucristo.

¹²Kui b'a maha, najmi tu 'baintehe ruu ngatitsuun tsa kui xi kuatéxumaha yjonintenuu xi maha 'me, tsa kuinú'yá'óhoon nga n'oo ni xi mjehe yjonintenuu. ¹³Najmi tu ngatitsuun 'boho yjonintenuu, tsa ni xi najmi nda n'oo. Tu sa ní Ntíaná tjohon yjonuu, jun xi ja tsayo ko j'áíya ngáhanuu ngabayoo. Tjohon yjonintenuu Ntíaná nk'ie nga n'oo ni xi naxu n'e. ¹⁴Najmi ta kuatéxumahanuu ngatitsuun, at'aha najmi ta kjuatéxumoo tjiñanehenuu. Kjuandaha ní Ntíaná tintsubanankiu nd'ai.

B'i ts'ín tsakúya Pablo nk'ie nga najmi ta batéxumahaná ngatitsuun

¹⁵Ei ni ma, ¿a n'eé ngatitsun, tsa najmi ta kjuatéxuma xi kin'ekjas'ehen Moise tjiñanehená, at'aha kjuandaha Ntíaná tintsubanankiá? ¡Najmi! ¡Ndaha tsa mí yjehe! ¹⁶¿A najmi yanú, tsa tjin xi n'ekjas'ohoon yjonuu nga kuinú'yá'óhoon xi nkúhu xuta musuhu, jun xi bichúmo xuta musuhu xi tînu'yá'óhoon? Tsa xuta musuhu ngatitsuun kamo, kuayó. Tunga tsa kuinú'yá'óhoon Ntíaná, naxu kamo nginkun. ¹⁷Jun xi kamo xuta musuhu ngatitsuun nistjin nk'ie, tunga nd'ai máb'achjîhi ra Ntíaná nga tu sahá ngayjehe animanuu tînu'yá'óhoon én xi tsinchiyó, én xi kin'ekjas'ennuu. ¹⁸Ja kamandoóho ngatitsuun ko tsichumo xuta musuhu ni xi naxu tjin.

¹⁹Tíb'ejná chubayanuu ni xu'bi nga tinchjakonuu at'aha 'ni mankjinná ni. Nistjin nk'ie, ni xi chuntí nginkun Ntíaná ko kjuach'onk'uun kin'ekjas'ohoon yjonintenuu tu xi ch'on kin'ehenu. Xuta musuhu niu kamo, tunga nd'ai n'ekjas'on yjonintenuu nga kamo xuta musuhu ni xi naxu tjin tu xi xuta xi ts'e Ntíaná kamahanu.

²⁰Nk'ie nga kamo xuta musuhu ngatitsuun, kjin tintsuboho ni xi naxu tjin. ²¹¿Mí nihi xi kisakúnuu nga kin'o ni xi kin'o nk'ie, ni xi tu subahá manuu nd'ai? Ngabaya y'aha ra ni xi kin'o. ²²Tunga nd'ai ja kamandoóho ngatitsuun ko yjankihuu Ntíaná. Tísakúnuu kjuaje xi tsjánuu Ntíaná tu xi kuintsuba tîk'un sfhinuu. ²³At'aha ngabayoo, kui xi chjîhi ngatitsuun, tunga Ntíaná tu tsjáhá nga k'úentu tîk'un sín xuta xi nkuhú makó Ndá Ntíaná Jesucristo.

B'i ts'ín y'éjña chubaya Pablo nga ja tsayahá kjuatéxumoo

7 Jun já nts'e, tinchjakonuu jun xi yo kjuatéxuma xi kin'ekjas'ehen Moise. ¿A najmi yanú nk'ie nga tjintu tîk'un sa xuta y'aha

kjuatéxumoo? ²Xi nkúhu nku tǎchjuún xi tǐjǎhǎ x'ǐn, tǐjt'a kjuatéxumoo nga najmi tǐjǐhin nga k'úéjǎ x'ǐhǐn. Tunga tsa kuayá x'ǐhǐn, kama ndǎí ngáha rǎ yjohǒ kjuatéxumahǎ kjuabixoon. ³Kui nga tsa kj'ǎí ndǎ k'úéjǎkoho nk'ie nga tǐjǎ sa x'ǐhǐn, tǐbangane kjuabixahǎn. Tunga tsa kuayá x'ǐhǐn, kama ndǎí ngáha rǎ yjohǒ ni xi tǐjt'a kjuatéxumoo. Najmi tǐbangane kjuabixoon tsa kj'ǎí ndǎ k'úéjǎko ngáha.

⁴B'ǎ tǎ kamanuu, já nts'ena. Xi ja k'ien najmi tǎ y'ahǎ rǎ kjuatéxumoo, kǒ jun ja tsyakoo Cristo nk'ie nga k'ien tǔ xi kj'ǎí xi kama ts'e ngáhanuu. Xi j'ǎíya ngáha rǎ ngabayoo, kui xi ts'enuu nd'ǎí. B'ǎ ts'ǐn kama n'ehená ni xi ts'e Ntǐaná. ⁵Nk'ie nga kich'a saǎ asuntee, ngatitsuun kits'ǐnxǎjǐn yjonintená. Ngatitsuun kits'ǐnchjén kjuatéxumoo nga kin'e mjeé ni xi najmi ndǎ, kǒ kin'eé ni xi tǐjehen rǎ ngabaya.

⁶Tunga nd'ǎí ja najmi tǎ kjuatéxumoo tǐjǎnehená, ǎt'ahǎ ja tsayahǎ kjuatéxuma xi kik'ǐét'a'yúnnǎ nǐstjǐn nk'ie. Kui nga tǐn'ehená ni xi mjehe Ntǐaná nd'ǎí xi nkú ts'ǐn tǐbakú nǐyǎ tsetsená Espirituhu Ntǐaná, najmi xi nkú ts'ǐn tsakú nǐyǎná xujun xi kis'et'a nǐstjǐn nk'ie.

B'ǐ ts'ǐn tsakúya Pablo xǎ xi tǐjǐhǐn kjuatéxumahǎ Ntǐaná

⁷Eǐ ni ma, ǎnkú kuixǎán? ǎA kjuatéxuma xi kin'ekjas'ehen Moise y'a ngatitsun? ǐNajmi! ǐNdaha tsa mí yjehe! Tunga tsa najmi kis'ejǎ kjuatéxumoo, najmi kikié rǎ ni xi 'mihǐ ngatitsun. Najmi be tsa najmi ndǎ tǐjǎ nk'ie nga ni xi tǐjǐhǐn xuta kjuasǐhǐn tsa najmi b'ǐ tǐtsu kjuatéxumoo: “Najmi tǔ fasihǐn ni xi tǐjǐhǐn xuta.” ⁸Tunga ngatitsuuhún kits'ǐnchjén ni xi tǐjt'a kjuatéxumoo kǒ b'ǎ ts'ǐn kinchǎhana nga jasǐhǐn nkjǐn tǐkjǎ ni xi najmi an ts'ǎn. ǎt'ahǎ tsa najmi tǐjǎ kjuatéxuma, najmi tǐjǐhǐn nga'yún ngatitsuun.

⁹Xi nkúhu an. Nk'ie nga najmi kǐee s'ejǎnana kjuatéxuma xi kin'ekjas'ehen Moise, tsátejǎ tǐk'an. Tunga nk'ie nga kamankjinna ni xi tǐjt'a kjuatéxumoo, kisakú nga'yúhún ngatitsuun, ǎs'ǎi tsaya.

¹⁰Kikié nga kjuatéxuma xi tǐjǐhǐn nga ts'ǐnk'ǐéjǎ tǐk'unna, kui xi tǔ sahǎ kits'ǐnkjǐna ngabayoo. ¹¹ǎt'ahǎ ngatitsuun kits'ǐnchjén ni xi tǐjt'a kjuatéxumoo tǔ xi ts'anachǎhana. B'ǎ ts'ǐn kits'ǐnk'ienkohona ni xi tǐjt'a kjuatéxumoo.

¹²Jehé kjuatéxumoo, kǒ ni xi tǐjt'a kjuatéxumoo je kǒ nǎxu tǐnchǎ kǒ ndǎ. ¹³Tunga, ǎa ni xi ndoo xi kitsǎná ngabaya? ǐNajmi! ǐNdaha tsa mí yjehe! Ngatitsuun ní kits'ǐnchjén ni xi ndoo nga kitsǎná ngabaya tǔ xi chǎha nga kui xi ngatitsun. Ni xi tǐjt'a kjuatéxumoo tsakúchǐi nga tǔ xǐ 'yúhún ch'onk'un ngatitsuun.

B'ǐ ts'ǐn tsakúya Pablo ni xi ts'ǐhǐn ngatitsuun

¹⁴Yǎá nga kjuatéxumoo ǎjihǐn Espirituhu Ntǐaná tsitjuhu, tunga an ǎsuntee y'ahana. Ja ts'atsena ngatitsuun kǒ an kama ndǎ

musuhǔ. ¹⁵Najmi mankjinna ni xi ts'ian. At'ahǔ najmi ni xi mjena ts'ian. Tǔ sa ní ni xi najmi sasǐnna, kui nihi xi ts'ian. ¹⁶Tunga tsa ts'ian ni xi najmi mjena ts'ian, ni xi títs'ian títs'inkíékohona yjonǔ nga nda kjuatéxumoo. ¹⁷Kui nga najmi tǔ an xi b'ǔ ts'ihinna nga b'ǔ ts'ian. Ngatitsun xi tǐǎajin nína xi b'ǔ ts'ín.

¹⁸Be nga xi nkú ts'ín y'ahana ǔsuntee, ndaha nku ni xi nda najmi tǐǎajinna. At'ahǔ ndaha tsa mjena ts'ian ni xi nda, tunga najmi chúkjuahána b'ǔ ts'ian. ¹⁹Najmi ts'ian ni xi nda xi mjena ts'ian, tǔ sa ní ni ch'onk'un xi najmi mjena ts'ian. ²⁰Tsa ts'ian ni xi najmi mjena ts'ian, najmi tǔ an xi b'ǔ títs'ihinna. Ngatitsun xi tǐǎajin nína xi b'ǔ títs'íun.

²¹Mankjinna ni xu'bi. Nk'ie nga mjena ts'ian ni xi nda, tǔ ni ch'onk'un xi tǐǎajihinna bitjuchji. ²²Tsjo mahǔ animana kjuatéxumaha Ntǐaná, ²³tunga mankjihinna nga kj'ǎi kjuatéxuma títs'ínxǎjin yjonintena, kui xi kjuatéxumaha ngatitsuun. Kui xi kjánko kjuatéxuma xi tsǎniyáha kjuankjintak'unna. F'akj'ánijéna ko ts'ín mana nda nubayáha.

²⁴ǐNimǔ rú ts'ihinna! ¿Yá xi kuasinkona tǔ xi kama ndǎihǐ ra yjoninte xu'bi xi títsǎna ngabaya? ²⁵ǐTsjaǔ máb'achǐhǐ Ntǐaná! Ndǔ Ntǐaná Jesucristo kits'ín ndǎina. Títs'inchǐén kjuankjintak'unna nga tínt'e'éhen kjuatéxumaha Ntǐaná, tunga xi nkúhu nku nda, kjuatéxumaha ngatitsuun tínt'e'éhen.

B'ǐ ts'ín tsakúya Pablo nk'ie nga Espirituhǔ Ntǐaná ts'ínk'íentu tǐk'unná

8 Kui b'ǔ maha, najmi tǔ chumi nihi tǔ n'enijéhe ra xuta xi nkuhú mako Cristo Jesu, ²at'ahǔ Espirituhǔ Ntǐaná ts'ínk'íentu tǐk'unkoná Cristo Jesu ko tsǎná nku kjuatéxuma xi ts'ín ndǎiná kjuatéxumaha ngatitsuun ko ngabayoo.

³Ni xi najmi kamaha kits'ín kjuatéxuma xi kin'ekjas'ehe Moise at'ahǔ ǔsuntee y'ahǔ ra xuta ko najmi kamaha ts'íntjusun ni xi tǐt'a, kui nihi xi kits'ín Ntǐaná nga kits'ín nibá Ntǐhǐ. Ntǐu kik'a yjoninte xi nkúhu yjoninte ngatitsuhun xuta tǔ xi y'échǐjntjaihi ngatitsuun. B'ǔ ts'ín kik'ojennkihi Ntǐaná ngatitsun xi tǐǎajihin xuta. ⁴B'ǔ kits'ín Ntǐaná tǔ xi kuitjusuhun ajinná ni nda xi banki kjuatéxumoo, ná xi najmi tǔ tintsuhána xi nkú ts'ín mjehe yjonintená. Tintsuhǔ nínáá xi nkú ts'ín mjehe Espirituhǔ Ntǐaná.

⁵At'ahǔ xi ǔsuntee y'ahǔ ra nga tǐntu, kui xi ni xi ts'e ǔsuntee ts'ínkjink'un, tunga xi Espirituhǔ Ntǐaná y'ahǔ ra nga tǐntu, kui xi ni xi ts'e Espiritu ts'ínkjink'un. ⁶Xi ni xi ts'e ǔsuntee ts'ínkjink'un, kui xi kuayá, tunga xi ni xi ts'e Espirituhǔ Ntǐaná ts'ínkjink'un, kui xi k'úentu tǐk'un ko s'ehe kjuajyu. ⁷At'ahǔ xi ni xi ts'e ǔsuntee ts'ínkjink'un, kui xi unkie Ntǐaná. Najmi tǐntunkí kjuatéxumaha

Ntǐaná kǒ najmi mahǎ tsa b'ǎ incha ts'ǐn. ⁸Xi ǎsuntee y'ahǎ rǎ nga tǐntu, kui xi najmi mahǎ ts'ǐn ni xi tsjohǒ Ntǐaná.

⁹Tunga máha jun, ja najmi tǎ ǎsuntee y'ahanuu nga tintsuǒo. Espirituhu ní Ntǐaná y'anuu nga tintsuǒo tsa kjuaxǐ nga kui xi tǐñajinnuu. Xi najmi tǐñajinhǐn Espirituhu Jesucristo, kui xi najmi Jesucristo ts'ehe.

¹⁰Tunga tsa Cristo tǐñajinnuu, tsuhu rǎ nga Espirituhu tǐts'ǐnk'ǐéntu tǐk'unnuu kǒ ja nǎxu tsichumo nginkun Ntǐaná, ndaha tsa ngatitsuun ja kits'ǐnk'ǐen yjonintenuu. ¹¹Tsa Espirituhu xi kits'ǐnkj'ǎiyahǎ Jesu ngabayoo tǐñajinnuu, tǎ kuihi xi kits'ǐnkj'ǎiyahǎ Jesu tǎ ts'ǐnk'ǐéntu tǐk'un yjonintenuu xi mahǎ 'me. B'ǎ ts'ǐnkonuu Espirituhu Ntǐaná xi tǐñajinnuu.

¹²Kui b'ǎ mahǎ, já nts'e, ja najmi tǎ tǐhǐn tsa kuǐntsubǎǎ xi nkúhu xuta xi ts'ǐn ni xi mjehe yjonintee. ¹³At'ahǎ tsa kuǐntsubǒo xi nkúhu xuta xi ts'ǐn ni xi mjehe yjonintee, kuayó. Tunga tsa Espirituhu Ntǐaná n'ek'ǐenkohonu ni xi mjehe yjonintenuu, kuǐntsubǎ tǐk'un.

¹⁴Ngayjee xi Espirituhu Ntǐaná bakú nǐyǎhǎ, kui xi ntǐhi Ntǐaná. ¹⁵At'ahǎ Espiritu xi kin'ekjǒhooon najmi kits'ǐn manuu xuta musuhu kjuabinkjuun. Kits'ǐn ma nǐnuu Ntǐhi Ntǐaná kǒ ts'ǐn nga: “Na'mi ǐhǐ”, k'úfǐhǐn Ntǐaná. ¹⁶Kui Espirituhu Ntǐaná nkuhú mako animaná nga tsuya kixǐ nga ñǎ xi ntǐhi Ntǐaná. ¹⁷Tsa ñǎ xi ntǐhi Ntǐaná, tǎ sakúnǎ ni xi ts'e. Jesucristo n'ekjǎínkoóho ni xi ts'e Ntǐaná. Tsa nd'ǎi tǐbitjajǎán kjuanima xi j'ajin, tǎ sakúnǎ kjuachánkaha.

B'ǐ ts'ǐn tsakúya Pablo nk'ie nga tǐchuyáhǎǎ nǐstjin nga Ntǐaná ts'ǐn ma kikjinnǎ ntǐhi

¹⁸B'ǎ mana nga najmi chumi nihi kjuǎ'un xi tǐbenǎ nǐstjin nd'ǎi tsa ch'achubakohonǎ kjuachánkaha Ntǐaná xi kama chjinǎ askahan.

¹⁹Ngayjee ni xi kits'ǐnnda Ntǐaná tǐncha kuyǎ kǒ 'yún mjehe nga s'ejǎna chji yǎ xutaha xi ntǐhi Ntǐaná. ²⁰At'ahǎ ni xi kamandoo najmi tǎ tǐhǐn rǎ nga'yún xi kis'ehe nga tjuhun. Najmi kui kama mjehe nga b'ǎ kamat'ain. Ntǐǎ nǐnǎ b'ǎ ts'ǐn y'éndǎ nga b'ǎ kamat'ain. Tunga tǎ tǐkuyahǎ rǎ ²¹ni xi kamandoo nǐstjin nga najmi tǎ kuǎtsúhun. Tǐkuyáhǎ nk'ie nga kama ndǎihǐ ch'ǎ xi y'anji, nǐstjin nk'ie nga b'ǎ ts'ǐn kama ndǎihǐ xi nkú tsjo ts'ǐn kama ndǎihǐ ntǐhi Ntǐaná.

²²Yǎǎ nga santaha nd'ǎi un tǐbehe ngayjee ni xi kits'ǐnnda Ntǐaná, xi nkúhu nku tǎchjuún xi tsǐhǐn ntǐ. ²³Kǒ najmi tu nku kui xi un tǐbehe. Tǎ un tǐbenǎ kǒ ñǎ. At'ahǎ ja tǐñajinnǎ Espirituhu Ntǐaná. Ja kik'ǎi tǐtjunnǎ ajihǐn ngayjee ni xi n'ekjǎihǐn askahan. Nkjún tǐbehe animaná nga tǐchuyáhǎǎ nǐstjin nga ts'ǐn ma kikjinnǎ Ntǐaná ntǐhi, nǐstjin nga n'ek'anki yjonintená.

²⁴At'ahǎ ja kin'ek'ankiná kǒ tǐchuyáhǎǎ ni xi sakúnǎ, tunga tsa ja kisuya ntsǎǎ ni xi tǐchuyáhǎǎ, najmi tǎ tǐchuyǎ sahǎ rǎǎ ni xu'bo. ¿At'ahǎ yǎ xi kuyáhǎ ni xi ja tǐñahǎ? ²⁵Tunga tsa tǐchuyáhǎǎ ni xi najmi kǐje yǎǎ, tǐhǐn nga chuyáhǎǎ santa nkúhu nga n'ekjǎihǐn.

²⁶Ta basinkoná Espirituhu Ntíaná, at'ahá najmi ndjá tǐntuyáná. Najmi yaá ni xi kuincháá, tunga Espirituhu ní Ntíaná bankintjái. Nk'ie nga nchjantjai un'unná Espiritu nginkun Ntíaná, najmi tǐn éni xi kuixinyahaná xi nkú tsu. ²⁷Ntíaná xi be animaha xuta, kui xi be mí xi mjehe ts'ín Espiritu. At'ahá xi nkú ts'ín mjehe Ntíaná, b'a ts'ín banki Espiritu nga nchjantjai xuta xi Ntíaná kíkǐáts'e.

B'ǐ ts'ín tsakúya Pablo xi nkú ts'ín tjoná Ntíaná

²⁸Yaá nga ngayjee ni xi mat'ain xuta xi incha ts'íntjo Ntíaná, Ntíaná ts'ínchjén niu ngandaha xuta xu'bo. Ntíanáhá j'ájihin xuta xu'bo at'ahá b'a ts'ín kama mjehe. ²⁹At'ahá xuta xi kíkǐe tǐtjun Ntíaná, ta y'éndá tǐtjun nga b'a ts'ín s'eyaha xi nkúhu Ntǐhi, tu xi kui Ntíu kamaha Ntǐ tjun qjihin já nts'e xi nkjin maha. ³⁰Ko xi y'éndá tǐtjun Ntíaná, ta j'ájin. Ko xi j'ájin, ta kits'ín nga tsichu ma naxu nginkun. Ko xi kits'ín nga tsichu ma naxu nginkun, ta kitsjáha kjuachánka.

³¹Kui b'a maha, ¿nkú kuixín sahaná? Tsa Ntíaná makoná, ¿yá xi ngjuai kontráná? ³²Kui xi ja y'éjǐa nga tu nkú tsjáhá Ntǐhi. Kits'ínkjas'en Ntǐhi nga kin'ek'ien ngandaná. Kui nga tsa kitsjáná Ntǐhi, ¿nkú ts'ín najmi ta tsjáhaná ngayjee ni xi tǐn?

³³¿Yá xi kamaha ts'ínk'anji jé xuta xi Ntíaná j'ájin? Ntíaná kits'ín nga naxu xuta xi ts'e. ³⁴¿Yá xi b'a kuitsu nga ngatitsun y'a? Cristo Jesu k'ien ko j'áiya ngáha ra ngabayoo ko tǐjǐat'aha Ntíaná nd'ai nga tǐbankintjái. ³⁵Tjoho ná Cristo. ¿Yá xi kamaha kjé'aná kjuatjoho? ¿A kjuanimá? ¿A kjuaboo? ¿A kjua'unchoo? ¿A kjintío? ¿A tu ngat'aha nga x'aán? ¿A ni ch'onk'un xi mat'aán? ¿A ra ngahá n'ek'ienná? ³⁶B'a ma xi nkú ts'ín tǐt'a éhen Ntíaná:

Ngat'a ts'ǐ tehente tintsubajǐin ngabayoo.

Xi nkúhu chutsánka xi n'ek'ien, b'a ts'ín baseni jóo.

³⁷Tunga qjihin ngatentee ni xu'bi xi kits'íntjoná ta ts'ín nga tu sahá 'yún n'e ngana saá. ³⁸At'ahá behe k'an nga najmi tǐn xi kamaha kjé'aná kjuatjoho Ntíaná, ndaha tsa kuayáá ko ndaha tsa kuintsuba tǐk'aán, ta ndaha ntǐtsjee ko xi batéxuma ko xi tǐjihin nga'yún, ta ndaha ni xi tíma nd'ai ko xi kama askahan, ³⁹ta ndaha ni xi nk'a ko xi nanka, ta ndaha nku ni xi kits'ínnda Ntíaná. Najmi tǐn xi kamaha kjé'aná kjuatjoho Ntíaná, kjuatjo xi tsakúchjiná nga kitsjáná Ndá Ntíaná Cristo Jesu.

B'ǐ ts'ín tsakúya Pablo xi nkú ts'ín Ntíaná j'ájin xuta xi ntje judio tjeheh ra

9 Cristo be nga kjuaxi ni xi tǐxian. Najmi tǐb'anacha. Ko Espiritu Santo b'a tǐtsuna nga b'a tǐn ni xi tǐts'ínkjǐhin k'an. ²Tǐn babana ko ixí tǐneyahá tíma animana. ³Tsa kama kai, mjena tsa santaha an kama nku

xi najmi nda nginkun Ntíaná kò tsa kjin kúátejñahá Jesucristo, tsa tū ahá ni b'á ts'ín kama kúásinka já nts'é, kui xi ntjena. ⁴Xi ntje Israel tjehe ra. Ntíaná kits'ín ma ntíhi. Y'ejñajihín kò tsakúchjihí kjuachánkahá. Ni y'éndakò ntje cháha kò kitsjáha kjuatéxumahá. Tsakúchjihí xi nkú ts'ín tjíhín nga ts'íntsjohò kò kitsúya títjuhún ni xi tsjáha. ⁵Nkúhú ntje chá xi j'ájin Ntíaná, yò nibahá ra xuta Israel kò ajihín xuto tsitjujín xi kits'ín niba Ntíaná^b nk'ie nga kik'a yjoninte xi nkúhu xuta. Kui xi Ntía xi batéxumahá ngayjee ni xi tjín. Kan'etsjo tehentehe tū nkjéhé ni. B'á katuma.

⁶Tunga najmi j'a tiyahá éhen Ntíaná. At'ahá najmi ngatentee xuta xi y'ahá ra ntjehe Israel, tsa kui xi xuta Israel kikjin. ⁷Kò najmi ngatentee xi y'ahá ra ntjehe Abraham, tsa kui xi ntí kikjihín Abraham. At'ahá Ntíaná b'á kitsúhu Abraham: “Ntje xi s'ehi Isaac nibahá ra.” ⁸Kui xi tsuhú ra nga najmi ntí xi kis'ehe Abraham xi nkú ts'ín s'ená ntí, tsa kui xi ntíhi Ntíaná. Ntí xi kis'e níhi xi nkú ts'ín kitsúya títjun Ntíaná, kui xi kits'ínchjihí nga kui xi ntjehe Abraham. ⁹At'ahá kui én xu'bí xi kitsúya títjuhún Ntíaná Abraham: “Núni xi nkú ma nístjin xu'bí kuakuchjihí nga'yúnna. Nku ntíx'in s'ejñahá Sara.”

¹⁰Kò najmi tū nku ni xu'bí kama. B'á tã kamat'ain Rebeca nk'ie nga y'a ntí'yún. Kui xi kama chjuúhún Isaac xi tã ntje cháha xuta Israel. ¹¹Ntíaná kinchjako títjuhún Rebeca nga kinchjanijmíyaha ntíhi nk'ie nga najmi kjee tsin kò najmi kjee ts'ín ni xi nda kò a ra ni xi ch'onk'un, tū xi kuitjusuhún ni xi y'éndá títjun Ntíaná nga j'ájin ntí xi kama mjehe. At'ahá Ntíaná f'ájin xuta xi mjehe, najmi f'ájin tū ngat'ahá ni nda xi ts'ín xuta. ¹²Kui nga b'á kitsúhu ra Rebeca: “Ntí xi tjun tsún, musúhu ntí xi tsjénkiu kama.” ¹³Xi nkú ts'ín tjít'a éhen Ntíaná nga b'í títso: “Tjo kits'ian Jacob kò kits'in unkie Esau.”

¹⁴Kui b'á maha, ¿nkú kuixíhinná? ¿A ts'ín Ntíaná ni xi najmi naxu tjín? ¡Najmi! ¡Ndaha tsa mí yjehe! ¹⁵At'ahá b'á kitsúhu Moise: “Kama nímāna xi mjena nga kama nímāna, kò kuase nímāha xi mjena nga kuase nímāha.” ¹⁶Kui b'á maha, najmi ngat'ahá tsa ni xi mjená kò tsa ni nda xi tín'eé, tsa kui kjuaha nga nda ts'ínkohoná Ntíaná. Nda ní ts'ínkóná at'ahá ma nímāha ná. ¹⁷At'ahá b'í ts'ín tjít'a má nga b'á kitsú Ntíaná nga kinchjako nda faraon: “Kitsja xáha tū xi kuakuchjihina nga'yúnna kò tū xi chahana nga ngúsuhún asunntee.” ¹⁸Kui b'á maha, Ntíaná ma nímāha ra xi mjehe nga kama nímāha kò ts'ín ndjá anímāha xi mjehe nga ts'ín ndjá anímāha.

B'í ts'ín tsakúya Pablò xi nkú ts'ín Ntíaná bakúchji kjuakjahan kò kjuatsentaha

¹⁹Kutsa b'áhá kuixíní: “¿Mí nihi xi ts'ínnijéhená Ntíaná yò ni ma? At'ahá, ¿yá xi ma fi kontrahá ni xi mjehe Ntíaná?”

^b 9.5 “Xi kits'ín nibá Ntíaná” tsuhú ra “Cristo”.

²⁰ ¿Yáhá ni ji ndá, tsa kuǐnchǐhi kuenta Ntǐaná? Nku ndjǐi najmi ma: “¿Á b'a n'e kin'endahaní?”, tsa kuǐtsuhu xi kits'ǐnndaha. ²¹ ¿A najmi tjǐhín ra kixi ndá xi ts'ǐnnda ndǐú nga ts'ǐnko nintee xi nkú ts'ǐn mjehe? Ta kuihi nintee kama ts'ǐnndako nku ndjǐi xi sasǐjǎa tsjo ko nku xi n'echjén tehente.

²² Ntǐaná mjehe nga kuakúchji kjuakjahan ko nga k'uejǎa chji nga'yúhun. Tunga títs'ín chúkjuaha ko títs'ǐntsentako xuta xi nǐbajennehe kjuakjahan, kui xi xá n'ekjehe. ²³ B'a títs'ín Ntǐaná tu xi chaha ra xi nkú ts'ín chánka kjuachánka xi tjǐnkoho xuta xi tíma nǐmaha, xuta xi ja y'énda tíjún nga tsjáha kjuachánkaha.

²⁴ Ná xuta xu'bo. Ntǐaná J'ájinná najmi tu nku ajihǐn xuta xi ntje judío tjehe ra, tu sa ní ko ta ajihǐn xi najmi ntje judío tjehe ra. ²⁵ B'a kama xi nkú ts'ín y'é't'a éhen Ntǐaná nda profeta Osea nga b'ǐ títsu:

Xuta xi najmi xutana, kui xi ts'in ma xutana.

Ko xi najmi kits'intjá, kui xi ts'intjá.

²⁶ Ko xi má nga b'a kik'ihǐn xuta:

“Jun xi najmi xutana mahanu”,

b'a k'úǐn nga kui xi ntǐhi Ntǐaná xi tjǐna tǐk'uun.

²⁷ Ko b'a ta kitsú nda profeta Isaiá nga kinchjanǐmíyaha xuta Israel: “Ndaha tsa b'a ts'ín nkjin maha xuta Israel xi nkú joyaha tsumí xi tjǐndai ntáchak'uun, tunga tu chubahá xi n'ek'anke. ²⁸ At'aha ja ts'ǐntjusun xatǐ Ntǐaná ni xi kitsú nga kama nga ngúsuhun asuntee.” ²⁹ Xi nkú nga ta kitsú tíjún Isaiá nk'ie nga b'ǐ kitsú:

Tsa najmi y'éjǎa saná ntje Ntǐaná xi tjǐhǐn nga'yún,
ja ra b'a ta kamat'aán tsakai xi nkúhu xuta Sodoma
ko tsichu ma raá tsakai xi nkúhu xuta Gomorra.

B'ǐ ts'ín tsakúya Pablo yá xi naxu bichú ma nginkun Ntǐaná

³⁰ Kui b'a maha, ¿nkú kuǐxǐhinná? Xuta xi najmi ntje judío tjehe ra, xi najmi tsangisjai nga naxu k'úéntu nginkun Ntǐaná, kui xi naxu tsichu ma nginkun Ntǐaná. Kis'ejihǐn Ntǐaná, kui nga naxu tsichu maha. ³¹ Tunga máha xuta xi ntje judío tjehe ra, incha tsangisjái nga ts'ǐntjusun kjuatéxuma xi kin'ekjas'ehen Moise, tu xi b'a ts'ín naxu k'úéntuhu nginkun Ntǐaná, tunga najmi tsichukjuahá ra.

³² ¿Á b'a kamaha? At'aha najmi tsangisjái nga naxu k'úéntu nginkun Ntǐaná xi nkúhu xuta xi s'ejihǐn Ntǐaná. Tu sa ní incha kama mjehe nga ts'ǐntjusun ni xi tjít'a kjuatéxumoo tu xi b'a ts'ín naxu kuǐchú maha kai. Incha kisaténki ndjio xi saténki xuta. ³³ B'a kama xi nkú ts'ín tjít'a:

An k'uejǎa nanki Sion nku ndjio xi saténki xuta,
nku naxi xi ts'ǐnxuntuhu.

Tunga xi s'ejih̄in xi ts'in nibá,
kui xi najmi sakúhu kjuasuba.

10 Jun já nts'e, nk'ie nga nchjaka Ntíaná, bankintjá xuta Israel, at'aha mjena nga n'ek'anki. ²At'aha kama xinya nga kui xi yún tǐncha bangisjai ni xi ts'e Ntíaná, tunga najmi incha mankjih̄in ra xi nkú ts'ín tǐh̄in nga incha ts'ín. ³Najmi kamankjih̄in nga Ntíaná tu tsjáhá ra xuta xi s'ejih̄in nga naxu kama. Tu sa ní kuenta ts'e suba incha tsangisjai xi nkú ts'ín naxu kuichú ma nginkun Ntíaná. Najmi kits'ín nimakjua yjoho tsa ts'ínkjáih̄in nga Ntíaná tu tsjáhá ra xuta nga naxu kama nginkun. ⁴At'aha tsichutjusun kjuatexuma xi kin'ekjas'ehen Moise nk'ie nga j'ai Cristo, tu xi naxu kuichú maha nginkun Ntíaná ngayjee xi s'ejih̄in.

B'ǐ ts'ín tsakúya Pablo nk'ie nga ngayjee xuta xi s'ejih̄in Ntíaná naxu bichú ma nginkun Ntíaná

⁵B'ǐ ts'ín y'ét'a Moise xi nkú ts'ín naxu bichú maha xuta xi ts'intjusun kjuatexuma xi kin'ekjas'ehen Moise. B'ǐ kitsú: “Xi ts'intjusun ni xi tǐt'a kjuatexumoo, ngat'aha kjuatexumoo sakúhu ra nga k'úéjña tǐk'un.” ⁶Tunga b'ǐh̄i ts'ín y'ét'a ngá xi nkú ts'ín naxu bichú maha xuta xi s'ejih̄in Ntíaná: “Najmi tu b'ǐ ts'ín n'enkjintak'uin: ¿Yá xi ngjuajni ndjiojmi ján?” Tsuhu ra éin tsa n'e nibájen xi ts'ín niba Ntíaná ngajoho. ⁷Ko b'ǐ ta kitsú ya: “Ko najmi tu b'ǐ ts'ín n'enkjintak'uin: ¿Yá xi ngjuaj kinte t'anankiu?” Tsuhu ra éin tsa chjúsintjen xi ts'ín niba Ntíaná ngajoho ajih̄in xuta k'ien. ⁸B'ǐ kitsú Moise: “Tǐjnat'a tiñahi éhen Ntíaná, tsu'bai ko animahi tǐjnat'a.” Kui éin xi tǐbenijmí nd'aj, én xi tsu nga xuta tǐh̄in nga s'ejih̄in Ntíaná.

⁹At'aha tsa tsu'bai kuitjuhu nga n'ekiei yjohi nga Jesu xi Nda Ntíaná, ko tsa ngayjehe animahi s'ejih̄in nga Ntíaná kits'ínkjáiya ngáha ra Jesu ngabayoo, n'ek'ankihi. ¹⁰At'aha ajin animaha ní xuta nibáha ra nga s'ejih̄in Ntíaná, tu xi naxu bichú maha. Ko tsa bitjuhu nga b'a tsu nga Jesu xi Nda Ntíaná, tu xi n'ek'ankihi.

¹¹B'ǐ ts'ín tǐt'a éhen Ntíaná: “Xi s'ejih̄in Ntíaná najmi sakúhu kjuasuba.” ¹²At'aha nkuhú chasehe ra xuta xi ntje judio tjeheh ra ko xi najmi ntje judio tjeheh ra. At'aha nkuhú maha Nda Ntíaha ngayjee xuta ko tsjáha ngayjee xi kunchjakohe kjuanchiná xi tǐh̄in. ¹³At'aha b'ǐ ts'ín tǐt'a: “N'ek'anki ngayjee xi ts'ínkjáih̄in nga kui xi Nda Ntíaná.”

¹⁴Tunga xuta xi najmi kjee s'ejih̄in, ¿nkú ts'ín ts'ínkjáih̄in ra nga kui xi Nda Ntíaná? ¿Nkú ts'ín s'ejih̄in ra xi najmi kjee nt'é yáha kui? ¿Nkú ts'ín kuint'éhe tsa najmi tǐn xi k'uénijmíhi? ¹⁵¿Nkú ts'ín k'uénijmíhi xuta tsa najmi s'et'a xáha nga k'uénijmí? At'aha b'ǐ ts'ín tǐt'a: “Á b'a tsjo tǐh̄in nga f'aik'úhunná xi b'énijmíná én nda tsu.”

¹⁶Tunga najmi ngayjeehé xuta Israel kits'ínsih̄in én nda tsuhu Ntíaná. B'ǐ kitsú Isaia: “Ji Ntía, ¿yá xi kis'ejih̄in én xi y'enijmí?” ¹⁷Kui

b'a maha, s'ejinná Ntíaná nk'ie nga nu'yáá éhen, ko nu'yáá éen nk'ie nga s'enjminá Jesucristo. ¹⁸Tunga b'ahá xian: ¿A najmi kinu'yáhá éen? Johon, kinu'yá. At'ahq b'i ts'ín tjt'a:

Nga ngúsuun asuntee kinu'yá ntaha,
santaha má fekuhu asuntee tsichu éhen.

¹⁹Ko b'i ta xin ya: ¿A najmi incha kikiehé xuta Israel ni xu'bi? Tjun Moise b'i ts'ín y'ét'a éhen Ntíaná:

An ts'ian nga jun kama xintak'un
xi tu a xutahá,
ko ts'ian nga n'ekjankoo
xi najmi chumi nihi xi mankjihin.

²⁰Ko askahan kama k'un Isaiq nga b'i ta ts'ín y'ét'a éhen Ntíaná:
Xi najmi tsangisjaina, kui xi kisakúhu an,
ko xi najmi kingjásjaiyana, kui xi tsakuchjihí yjona.

²¹Ngat'a ts'e xuta Israel b'i ts'ín tjt'a: “Nku nistjin ntanta kik'ana nga kingjentéhe ntsa nku naxinantá xi najmi nt'é'éen ko si.”

B'i ts'ín tsakúya Pablo nk'ie nga ta tjin ajihin xuta xi ntje judio tjeheh ra xi ja ts'anki

11 Kui nga b'a xihinna, ¿a kits'ín t'axihín Ntíaná xutahq?
¡Najmi! ¡Ndaha tsa mí yjehe! At'ahq ta nda Israel ná, ntjehe Abraham. Ntje cháná Benjamin y'ahana. ²Najmi y'éjña t'axín Ntíaná xuta xi ts'e xi j'ájin títjun. ¿A najmi yanú xi nkú ts'ín tjt'a xujun éhen Ntíaná má nga nda profeta Eliq kinchjako Ntíaná ko tsatéjéne xuta Israel? B'i ts'ín tjt'a: ³“Ji Ntia, ja kits'ínk'ien xuta xu'bi já profeta xi ts'i ko ja kits'ínkatsún nqchan chjehi. Tu nkuhú an tíjña sa. Ta incha mjehe ta ts'iínk'ienna.” ⁴Tunga b'ahá kitsú Ntíaná: “Ja kits'in ts'an yatu mi já xi najmi tsasinkúch'int'ahq ntia Baal.”

⁵B'a ta tíma nistjin nd'ai. Tu ngat'ahq kjuandaha Ntíaná tjintu sa chuba xuta xi Ntíaná j'ájin. ⁶Tsa tu ngat'ahq kjuandaha Ntíaná kichj'ajihin xutai, tsuhu ra nga najmi kichj'ajin tu ngat'ahq ni nda xi incha kits'ín. At'ahq tsa tu ngat'ahq ni nda xi incha kits'ín xuta kichj'ajihin, kjuandaha Ntíaná najmi ta chjihí ra ma.

⁷Kui b'a maha, ¿mí nihi xi kama? Najmi kisakúhu ni xi tsangisjái xuta Israel. Xi j'ájin ní Ntíaná, kui ní xi kisakúhu niu. Xingisoq kama ndjá animahq. ⁸B'a kama xi nkú ts'ín tjt'a: “Ntíaná kitsjáha xuta xu'bo kjuankjintak'un tiya, tunkun xi najmi skuəkoho ko tjabaxínju xi najmi kuint'ékoho santaha nistjin nd'ai.”

⁹Ko b'i ta kitsú ya David:

Kasaténkiko s'íhi xuta xu'bo,
ta kuihi kats'ínndyjajihin ko kats'ínk'íechjihí.

¹⁰Incha katuma ka tu xi najmi ta skuéhe,
ko musu incha katuma sín.

**B'ì ts'ín tsakúya Pablo nk'ie nga ta n'ek'anke
xuta xi najmi ntje judio tjeheñ ra**

¹¹Kui nga b'a xihinna, ¿a tu niyá kis'entuhú xuta Israel nk'ie nga kisaténki? ¡Najmi! ¡Ndaha tsa mí yjehe! B'ì ní kama. Tu ngat'aha nga najmi kint'éléhen Ntíaná xuta Israel, kui nga j'aihi ra én xi ts'ínk'ankihí xuta xi najmi ntje Israel tjeheñ ra, tu xi b'a ts'ín kama xintak'uhun xuta Israel. ¹²Tsa tu ngat'aha nga najmi kint'éléhen Ntíaná xuta Israel, tsa kui ngat'oo kisakúhu ra kjuanchináha Ntíaná xuta xi tjín asuntee, ko nk'ie nga kisaténki Israel kisakúhu kjuanchináha Ntíaná xuta xi najmi ntje Israel tjeheñ ra, ¿nkú sa kama nk'ie nga sakú ngáha ra xuta Israel ante xi ts'e nginkun Ntíaná?

¹³Tínchjakoñuu jun xi najmi ntje Israel tjeheñuu. Ntíaná kits'ín mana nda postruhú xuta xi najmi ntje Israel tjeheñ ra ko xinya kjuachánkaha xána. ¹⁴B'a ts'ian tsa tu ahá ni ngat'anuu kama xintak'uhun ntjena, tsa tu xi b'a ts'ín n'ek'ankehi k'ua. ¹⁵At'aha kisakúhu kjuajyu nginkun Ntíaná xuta xi tjín asuntee nk'ie nga kin'e t'axín xuta Israel. Kui nga, ¿nkú sa kama nk'ie nga n'ekjáiñ ngáha ra? Sakú ngáha ra nga k'úentu tík'un xuta k'ien.

¹⁶Tsa tsje nginkun Ntíaná na'yu xi n'endakoho nǐnkuñ chje xi 'bai tjuhun Ntíaná, tsuhu ra nga ta tsje ngayjee na'yu nǐnkuon. Tsa tsje nginkun Ntíaná kjamaha nku yá, tsuhu ra nga ta tsje tjiaha.

¹⁷Xuta Israel, kui xi nkú joyaha tjia xi kitit'áha nku yá olibo, ko ji xi nkú joyaha tjiaha yá olibo jñá. Tunga jihí kis'et'ai antehé tjia xi kitit'óo ko kisakút'aihi kjuatík'un xi tjñajin kjamaha yá olibo xi ndoo. ¹⁸Tunga najmi tu nk'ahá n'esjei yjohi, tsa b'a kuixín nga ji xi 'yún nda sai nga tjia xi kitit'óo. Tsa mjehi nk'a n'esjei yjohi, tu sahá n'ekj'áitsjein nga kjamaha yóo y'aha ri. Najmi ji xi kich'ai kjamó.

¹⁹Kutsa b'ahá kuixín: “Tu xi an s'et'ahana antehé yóo, kui nga kitit'áha.” ²⁰B'a tjín. Tunga kitit'áha at'aha najmi kis'ejihin Ntíaná, ko ji ndjá tisinjñai nd'ai at'aha s'ejihin. Kui nga najmi tu n'enkjíntak'uhunni tsa ji xi 'yún nda sai. Tu sa ní tǐnkjún Ntíaná. ²¹At'aha tsa Ntíaná najmi kits'ínndyjat'aha tjia xi ndaha yá olibo, ¿a tu kjehé ji ts'ínndyjat'ahi nga tu kisut'aní yóo?

²²Chasei xi nkú ts'ín nda ko ndjá ts'ínko Ntíaná xuta. Ndjá kits'ínko xi kisaténki ko ji nda kits'ínkóhi. Ko nda ts'ínkóhi tsa tu nku kuinchunjíní kjuandaha. Tunga tsa najmi b'a n'ei, ko ta ji kuichát'ahi. ²³Ko ta xuta Israel, tsa ngjuakj'áha ra animaha ko s'ejihin Ntíaná, k'uai ngáha ra ante xi ts'e. At'aha tjíhin nga'yún Ntíaná nga tsjá ngáha ra ante xi ts'e xuta Israel ajíhin yá olibo. ²⁴At'aha ji xi nkú joyaha tjiaha yá olibo jñá tu kis'et'aní antehé yá olibo xi ndoo. Kui b'a maha, ¿a najmi kamahá k'uai ngáha ra xuta Israel antehé? At'aha kui xi tjia xi ndoo.

**B'i ts'in tsakúya Pablo nk'ie nga kama
nimaha Ntiana ngayjee xuta**

²⁵Jun já nts'e, mjena nga choo nku ni xi y'éjña 'ma Ntiana, tu xi najmi nk'a n'esjehenu yjonuu. K'ua xi tjin ajihin xuta Israel kama ndjá animaha. B'a kama santa nkúhu nga sakúntehe nginkun Ntiana ngayjee xuta xi najmi ntje Israel tjeheh ra. Kui xi tjin nga n'ek'anki. ²⁶Nk'ie nga ja b'a kama, ta n'ek'anki ngayjee xuta Israel. Xi nkú ts'in tjit'a éhen Ntiana:

Nanki Sion nibaha xi ts'ink'anki xutana,
kui xi k'ejihin kjuach'onk'uhun ntjehe Jacob.

²⁷Kui nii xi y'endaka xutana nga ts'ian,
nk'ie nga ja k'jexian ngatitsuhun.

²⁸Najmi mjehe xuta Israel én nda tsuhu Ntiana. Ngandanuu xuta kontraha Ntiana tsichu ma. Tunga tjohó ra Ntiana xuta Israel tu ngat'aha nga Ntiana j'ájin ntje cháha. ²⁹At'aha najmi kje'a Ntiana ni xi tsjá ko ta ndaha najmi ts'in t'axin xuta xi j'ájin.

³⁰Nistjin nk'ie, najmi kinu'yá'óhoon Ntiana, tunga tibase nimahánuu nd'ai tu ngat'aha nga najmi kint'één xuta Israel. ³¹Ko santaha nistjin nd'ai najmi tint'één xuta Israel, tu xi ta chase nimaha ra tu ngat'aha nga jun kichase nimanuu. ³²B'i tjin ra nii. Ndaha nku xuta xi tjin najmi nt'é'éhen Ntiana. Ntiana y'éjñaha xuta nga najmi kint'één, tu xi nkuhú nga kama nimaha ra ngayjee.

B'i ts'in kits'intsjoho Pablo Ntiana

³³Já b'a nkjún ts'in chánkaha kjuanchinaha Ntiana! Já b'a nkjún ts'in nanqa ts'innkjink'uhun ko á b'a nkjún ts'in tsehe kjuankjintak'uhun! Najmi tjin xi mankjihin ni xi ts'in Ntiana ko najmi ch'a maha tsuya á b'a ts'ihin.

³⁴At'aha, ¿yá xi be xi nkú ts'in ts'innkjink'un Ntiana?

¿Yá xi kitsúyaha ni xi tjin nga ts'in?

³⁵¿Yá xi kits'inkienyaha tsa mí nihi,
tu xi Ntiana tjin nga ts'ink'óya ngáha ra?

³⁶At'aha Ntiana kits'innda ngayjee ni xi tjin. Ngat'aha ko nga tsjoho tjin niu. ¡N'ekie yjoná nga tjin kjuachánka Ntiana tu nkjéhe ni! B'a katuma.

**B'i ts'in tsakúya Pablo xi nkú ts'in
tintsubaá nd'ai nga ja yjankiá Cristo**

12 Kui b'a maha, já nts'e, at'aha tibase nimaná Ntiana, kui nga t'bankihinu nga ngayjehe tak'un n'etsjoho Ntiana, nga n'ekjas'ohoon yjonuu xi nkú joyaha nku chje t'k'un xi tsje ko xi sasihin Ntiana. ²Najmi tu bintsuboo xi nkú ts'in tjintu xuta

asuntee. Tû sa ní n'ek'óntjaiyo yjonuu xi nkú ts'ín Ntíaná títs'ín tsetse kjuankjintak'unnuu, tû xi b'a ts'ín kamankjihînnuu ni xi mjehe Ntíaná, ni xi nda, xi sasîhîñ kô xi ja nda tsichu ma.

³Nga nkúnkú jun tîñchjakonuu, at'ahâ Ntíaná kitsjána kjuandaha. Najmi tû nk'a n'esjo yjonuu. Nkú ní ts'ín tjíyanuu. B'a ts'ín n'esjo yjonuu xi nkú ts'ín kitsjánuu Ntíaná nga s'ejinuu. ⁴At'ahâ xi nkú ts'ín nkjin tíkjá maha ni xi y'ahâ yjonintenâ kô xi nkú ts'ín kj'ái kj'ái xá xi kik'ahî nga nkúnkú, ⁵b'a tã joyaha nã. Nkjin mahaná tunga nkuhú yjoninte kamakaá Cristô. Nga nkúnkáá kich'aá xinkíá.

⁶Kj'ái kj'ái ni xi maná n'eé. Kui kjuanda xi kitsjáná Ntíaná nga nkúnkáá. Xi Ntíaná kitsjáha éhen tu xi ts'ínkjás'ehen, kui xi katsúya éhen Ntíaná xi nkú ts'ín kik'ahî nga s'ejihîñ. ⁷Xi kik'ahî nga kuásinko xuta, kui xi katasinko xuta. Xi kik'ahî nga kuakúya, kui xi katakúya. ⁸Xi kik'ahî nga tsjá nga'yún, kui xi katsjá nga'yún. Xi kik'ahî nga tsjá toon, kui xi ngayjehe animahâ katsjá toon. Xi kik'ahî nga tsjén tíjñun, kui xi kixî katjiko xáha. Xi kik'ahî nga kuase nîmahâ xuta, kui xi tsjo kat'ehe nga b'a kats'ín.

B'î ts'ín tsakúya Pablo nk'ie nga kjuatjo tîñajinná

⁹N'etjô kjuaxî xinkiu. Najmi tû n'esiuhun ni xi ch'onk'un. Ni xi nda ch'a ntsja ntsjon. ¹⁰B'î ngján n'etjô xinkiu xi nkú ts'ín tjohô xinkjín xi nts'e maha, at'ahâ nts'ohó mahannuu xinkiu. 'Yún chankjún so xinkiu. ¹¹Kixî n'oo ni xi tîn'o kô najmi tû n'ets'o. Tû xi tsjohó kat'ehe animannuu nga n'oo ni xi mjehe Ndâ Ntíaná. ¹²Tsjo kat'enuu nga chúyohoo ni xi tsjánuu Ntíaná. N'echúkjuo kju'a'un xi tíyo. Najmi tû n'ekj'ajîun nga chubakoo Ntíaná. ¹³Tjohoon ni xi ndyjat'áha xuta xi yjanki Ntíaná kô nda n'ekjôhooon xi kuichúk'unnuu.

¹⁴Chubantjo xuta xi tjennki unkienuu. B'a t'ihun Ntíaná nga nda kats'ínkohô. Najmi tû ni xi najmi nda binchinó nga kamat'ain. ¹⁵Tsjo kat'ekonuu xi tsjo tjíhîñ. Ch'íiko xi tíkjintá. ¹⁶B'î ngján nda chasohô xinkiu. Najmi tû nk'a katumanuu yjonuu. Tû sa ní nda chasohô xuta x'an. Najmi tû xuta nkjink'un n'e ma suboo yjonuu.

¹⁷Najmi tû ch'on n'ohoo xi ch'on títs'innuu. Chasê nínú xi nkú ts'ín nda kama n'ohô ngayjee xuta. ¹⁸Tsa kama, tsa aya ntsôo tîñã, kas'ekonuu kjuajyu ngayjee xuta. ¹⁹Já nts'ena, najmi tû n'e ngajoyo ni xi tîn'enuu. Aya ntsja ní Ntíaná t'ejñayo xi b'a títs'ín. At'ahâ b'î ts'ín tjít'a éhen Ntíaná: "Ahán xi k'uasjé chjía, an xi tsjahâ chjîhi. B'a títsu Ntíaná." ²⁰B'î tã ts'ín tjít'a ya: "Tsa tíma bjohô ndâ kontrahî, tjeihîñ ni xi kjîñe. Tsa tíma xintáha, tjeihîñ ntá xi k'úí. At'ahâ tsa b'a n'eî, tû ni xí kama subahá rã ndâ kontrahî." ²¹Najmi tû 'baintei tsa kjuach'onk'uun xi ts'ín nganahî. Tû sa ní ni xi nda n'eî. B'a ts'ín n'e nganahâ rî ni ch'onk'uun.

**B'i ts'ín tsakúya Pablo nk'ie nga tjǎhin
nga chankjún xi batéxuma**

13 Ngayjee xuta tjǎhin nga kuǐnt'é'éhen xi batéxuma. At'aha xá xi tjǎhin xi batéxuma nginkun Ntǎaná nibáha ra. Ntǎaná y'éjǎna xóo. ²Kui nga xi fi kontraha ra xi batéxuma, kui xi tífi kontraha ni xi ja y'éjǎna Ntǎaná. Kó xi b'a títs'ín, ta kuihi tíbangisjai suba nga n'ekokjuaha.

³At'aha já xi batéxumoo najmi tjǐntu tsa tu xi ndjá ts'ínkoho xuta xi nda ni xi títs'ín. Xuta xi najmi nda ni xi títs'ín, kui xi b'a kats'ǎhin. ¿A mjehi nga najmi ndjá ts'ǐnkohi já xi batéxumoo? Tsa b'a, nda n'ei, kó nda ts'ín kuasehi já xi batéxumoo. ⁴At'aha ngandahi ní títs'ínxát'aha ra jóo Ntǎaná. Tunga tsa ni xi najmi nda tín'ei, tjǎhin nga kuǐnkjún tu ngat'aha ni xi ts'ǐnkohi jóo. At'aha najmi tu a tjǎhin xá jóo. Ntǎa níná títs'ínxát'aha tu xi ts'ǐnk'íechjǎhi kó ts'ǐnkokjuaha xi ch'on títs'ín. ⁵Kui nga tjǎhin nga kuǐnú'yá'éhen ráá já xi batéxumoo, najmi tu ngat'aha ni tsa ts'ǐnk'íechjǎn ni xi n'eé. B'a ní n'eé tu xi je s'eyaha kjuankjintak'unná nginkun Ntǎaná.

⁶Kui kjuaha nga b'echjǎhinu ni xi f'áchjǎnuu já xi tjǎhin xá, at'aha kui xi tíincha ts'ínxát'aha Ntǎaná. Xáha tíincha ts'ín. ⁷Tjohoon ni xi kanéhe nga nkúnkú jóo. T'echjǎnuu xi f'áchjǎntjai ni xi tjǎnnuu kó xi f'áchjǎntjai ch'á nga ts'ínxát'aha já Roma. Chankjún xi nkú ts'ín tjǎhin nga chankjún, kó nda n'esiuhun xi nkú ts'ín tjǎhin nga nda n'esihi.

**B'i ts'ín tsakúya Pablo mí kjuaha
nga n'etjóná xinkǎ**

⁸Najmi tu chumi nihi xi katsjennuu. Tjohoon kjuatjo xinkǎ. At'aha xi tjoho xinkǎ, kui xi títs'íntjusun ngayjee kjuatéxumaha Ntǎaná. ⁹B'i ts'ín tjít'a kjuatéxumoo: “Najmi tu ch'at'aihi chjǎhin. Najmi tu n'ek'iein animá. Najmi tu n'ei ndyjé. Najmi tu fasihi ni xi tjǎhin xuta.” Kui kjuatéxumoo kó ngayjee kjuatéxuma xingisoo nkuhú bichú majihin kjuatéxuma xu'bi: “N'etjói xutahi xi nkú ts'ín tjohi yjohi.” ¹⁰Xi tjoho xinkǎ, kui xi najmi ch'on títs'ǎhin. Kui nga bichútjusuhun kjuatéxumoo ajihin xuta xi tjǎhin ra kjuatjo.

¹¹B'a n'oo at'aha yo nǐstjin xi kich'aá nd'ái. Ja chubaha nga n'ekj'áhaá yjoná nga kuǐntsubá ndaá. Ja 'yún chuba ndyjaha nd'ái nk'ie nga Ntǎaná ts'ǐnk'ankiná. Najmi b'a ta tjǎn ndyjaha ra xi nkúhu nk'ie nga kis'ejinná. ¹²Ja ma kuǐchúhú chubá. Najmi ta n'ehená ngatitsun, ataha nk'ie nga ngatitsun n'eé, b'a joyaha xi nkúhu tsa má jyuun tintsubaá. Ni xi nda n'eé. Kui xi b'a ta joyaha xi nkúhu tsa má ndzjen tintsubaá. K'úendaá yjoná tu xi kuǐnimajǎhinná má ndzjeen.

¹³Kixǎ tankínká yjoná xi nkúhu xuta xi tjǎma nga nǐstjin. Najmi kuǐntsubá tsa tu xi s'ihiná kó chǐné. Najmi tjǎhin nga

chubá súntukonáá xinkíá kō tsa n'ejnu n'et'aá. Kō tã ndaha najmi tũ bixkjanqáá xinkíá kō tsa kama xin k'aán ni xi tǐhĩn. ¹⁴Tũ sa ní tĩnúngjiun yjonũ Ndã Ntĩaná Jesucristo kō najmi tũ n'enkjĩntak'un xi nkú ts'ín n'ehenu ni xi mjehe yjoninte ngatitsuun.

**B'ĩ ts'ín tsakúya Pablo nk'ie nga najmi
tǐhĩn nga n'ek'anjiá jé xinkíá**

14 Nda n'ekjóhoon xi najmi ndjá sǐjñajin xi nkú ts'ín s'ejinná, kō najmi tũ b'esikoo ngat'ahã xi nkú ts'ín ts'ínnkjink'un. ²Tǐjĩn xi b'ã ts'ín s'ejĩhĩn nga ma kjine tũ mí nichinehé ni, kō tǐjĩn ngá xi najmi ndjá sǐjñajin xi nkú ts'ín s'ejinná kui nga tũ xkqhá kjinehe. ³Xi kjine tũ mí nichinehé ni najmi tǐhĩn nga ch'on ts'ín kuasehe xi b'éch'ohõ yjohõ ni xi kjine. Kō xi b'éch'ohõ yjohõ ni xi kjine najmi tǐhĩn nga ts'ĩnk'anji jé xi kjine tũ mí nichinehé ni. B'ĩ incha kats'ín at'ahã Ntĩaná ja kits'ĩnkjǐhĩn nga joo. ⁴¿Yáha ji xi tĩn'ek'anjihinni jé ndã musũhũ xi kj'áí? Tsa ndjá sǐjñã ndã musũ kō tsa tísaténki, Ndã Ntĩahã kjinehe ni xu'bo. Tũnga ndjáhá kuasĩjña, at'ahã tǐhĩn nga'yún Ndã Ntĩaná nga ndjá ts'ĩnkasĩjñaha.

⁵Tǐjĩn xi b'ã maha nga 'yún nkjún sa nku nĩstjin nga kj'áí nĩstjin, kō tǐjĩn ngá xi tũ nku chubã maha nĩstjiun. Nkúnkú tǐhĩn nga ts'ĩnnkjink'un sisin xi nkú ts'ín behe k'un. ⁶Xi benkjún nku nĩstjin, kui xi b'ã ts'ín tũ xi benkjúhun Ndã Ntĩaná. Kō xi kjine tũ mí nichinehé ni, kui xi b'ã ts'ín tũ xi benkjúhun Ndã Ntĩaná. Tsjáhã máb'achjǐhi Ntĩaná ngat'ahã nichinehe. Kō xi b'éch'ohõ yjohõ ni xi kjine, kui xi b'ã ts'ín tũ xi benkjúhun Ndã Ntĩaná kō tã tsjáha máb'achjǐhi Ntĩaná.

⁷Najmi tǐjĩn qjinná xi kuenta ts'e suba tǐjña tĩk'uhun kō tsa kuenta ts'e suba 'mehe. ⁸Tsa tintsũbã tĩk'aán, Ndã Ntĩaná tintsũbã tĩk'uhunná. Kō tsa tĩbayaá, Ndã Ntĩaná tĩbayahaná. Kui b'ã maha, ndaha tsa tintsũbã tĩk'aán kō ndaha tsa tĩbayaá, Ndã Ntĩaná ts'ená. ⁹At'ahã kui kjuaha k'iehen Cristo kō j'áíya ngáha rã ngabayoo, tũ xi b'ã ts'ín kamaha Ndã Ntĩahã xuta k'ien kō xi tǐjĩntu tĩk'uun.

¹⁰Kō máha ji, ¿á ji tĩchasehe rĩ tsa ndã kō tsa najmi ndã tĩts'ĩhin ndã nts'ei? Kō tã, ¿á kinte n'esjeheni ndã nts'ei? Katumankjihĩn nga ndyjun nkinĩ kuasehe Ntĩaná mí nihi xi kin'eé nga nkúkáá. ¹¹B'ĩ ts'ín tǐj't'a éhen Ntĩaná:

Ahán xi tǐjñã tĩk'an, tĩtsu Ntĩaná.

Kuasĩnkúnch'in ngayjee xuta nginkán,

kō ngayjee ts'ĩnkie yjohõ nga an xi Ntĩã.

¹²Kui b'ã maha, nga nkúnkáá n'ekjas'ehéen kuenta Ntĩaná ni xi kin'eé.

**B'ĩ ts'ín tsakúya Pablo nk'ie nga najmi
tǐhĩn nga n'endyajjihĩn xinkíá**

¹³Kui nga najmi tã chasehe raá tsa ndã kō tsa najmi ndã ni xi tĩts'ín xinkíá. Tũ sa ní chasoo xi nkú ts'ín najmi n'endyajjihũun ndã

nts'o ko xi nkú ts'ín najmi n'ekijnejiun ngatitsun. ¹⁴S'ejinna Nda Ntǐaná Jesu ko be nga ndaha nku ni najmi chuntǐ nginkun. Tunga tsa tjǐn xi: “Chuntǐ ni xu'bǐ nginkun”, tsa kuǐtsu, tu nginkun ndohó chuntǐ niu.

¹⁵Tunga tsa tu ngat'aha ni xi tǐchinei tǐts'ǐnndyjajihǐn ra yjoho nda nts'ei, najmi ta tǐn'etjǐhoni nda nts'ei ma. Najmi tu 'bǐantei tsa tu ngat'aha nichinehǐ ndyjaha xuta xi k'ienntjǐhǐ Cristo. ¹⁶Najmi tu 'bǐanto tsa ch'on ts'ín kuǐnchjayane xuta ni xi n'ekjǐhoon nga nda. ¹⁷At'aha ni xi chǐneé ko ni xi s'ǐá najmi chumi ni chjǐhǐ ra. Nk'ie ní Espiritu Santo tsjǎná nga naxu kuǐntsubaá nginkun Ntǐaná ko nga s'ená kjuajyu ko kjuatsjo, kui ní ni xu'bǐ xi bakúchji nga ja tsitjas'enjǐán nga Ntǐaná tǐbatéxumaná. ¹⁸Xi b'a ts'ín tǐjǐna nginkun Cristo, kui ni xi tsjoho Ntǐaná ko xuta ta nda ts'ín nchjayanehe.

¹⁹Kui b'a maha, tǐnchǐsjaihiná xi nkú ts'ín s'ehená kjuajyu ko xi nkú ts'ín kuǐsǐnkaá xinkǐá nga saájián ni xi ts'e Ntǐaná. ²⁰Najmi tu ngat'aha nichinehǐ n'ekatsúhunnǐ xá xi tǐts'ín Ntǐaná ajihin xuta xi ts'e. Kjuaxǐ kǐjǐhǐn nga je nginkun Ntǐaná ngayjee nichine xi tjǐn, tunga najmi ndahá tjǐn tsa chǐneǐ nichine xi ts'ǐnkijnejihǐn ngatitsun xuta xingisoo. ²¹Tu sahá nda n'ei tsa najmi chǐneǐ yjo ko tsa najmi s'ǐ binu ko tsa najmi n'ei ndaha nku ni xi ts'ǐnkijnejihǐn ngatitsun já nts'ei.

²²Xi nkú ts'ín s'ejihin ni xu'bǐ, tu ji b'a ts'ín kas'ejihǐn ri nginkun Ntǐaná. Já b'a nda tjǐhin ts'e xi behe k'un nga nda tjǐn ni xi tǐts'ín ko najmi tǐts'ǐnnijéhe ra kjuankjintak'uhun askahan! ²³Tunga xi jo jan tǐmahá nga tǐkjine tsa mí nihi, ta kuihi tǐts'ǐnk'anji jé yjoho, at'aha najmi tǐts'ín xi nkú ts'ín s'ejihǐn. At'aha ngayjee ni xi n'eé xi fi kontra xi nkú ts'ín s'ejinná Ntǐaná, kui xi ngatitsun.

B'ǐ ts'ín tsakúya Pablo nk'ie nga tjǐhin nga kuǐsǐnkaá xinkǐá tu xi saájihinná ni xi s'ejinná

15 Nǎ xi ja ndjá tǐnchajián xi nkú ts'ín s'ejinná najmi tu n'eé ni xi tu nǎ tsjo subaháná. Tjǐhin ni nga n'ekjǐhǐhǐn xi najmi kjee ndjá tǐnchajǐn xi nkú ts'ín s'ejinná. ²Nga nkúnkaá tjǐhin nga n'eé ni xi tsjoho xinkǐá ko ni xi ngandaha n'eé, tu xi saájihǐn xi nkú ts'ín s'ejinná. ³At'aha ko ta Cristo najmi ni xi tsjoho kits'ǐn. Ni xi tjǐt'a ní éhen Ntǐaná má b'a tǐtsu kits'ǐnkjǐhǐn: “Én ch'on tsu xi kitsúhi xuta, kui xi j'aisaténa.” ⁴Ni xi kis'et'a nǐstjǐn nk'ie, kis'et'a tu xi kuakú niyáhaná. At'aha ajiin xujun éhen Ntǐaná sakújinná kjuatsenta ko sakú nga'yúnná tu xi chúyahá raá ni xi tsjǎná Ntǐaná.

⁵Ntǐaná xi tsjǎná kjuatsenta ko tsjá nga'yúnná, kui xi katsjǎnuu nga nkuhú n'enkjǐnk'un xi nkú ts'ín tjǐyahá Cristo Jesu. ⁶Nkuhú kas'eyá animanuu ko nkuhú katuma ntǎnuu. B'a ts'ín n'ekiehenu yjonuu nga tjǐhǐn kjuachánka Ntǐahá ko Na'mihǐ Nda Ntǐaná Jesucristo.

B'ǐ ts'ín tsakúya Pablo nk'ie nga xuta xi najmi ntje judio tjeheh ra tsichujǎhin én nda tsuhu Cristo

⁷Kui b'a maha, b'ǐ ngján nda n'ekjǎhin ruu xinkiu xi nkú ts'ín nda kits'ínkjǎinnuu Cristo, tu xi s'ejña chjhi kjuachánkah Ntíaná. ⁸At'ahá an b'a tǎxinnuu. J'ai Cristo ngandahá xuta xi ntje judio tjeheh ra. Tsakúchji nga ts'ín Ntíaná ni xi kitsú nga ts'ín. J'ai ts'íntjusun ni xi kitsúya tǎtjuhun Ntíaná ntje cháha xuta judio. ⁹B'a ts'ín kǒ tǎ xuta xi najmi ntje judio tjeheh ra ts'ínkie yjohǒ nga tǎjǎhin kjuachánka Ntíaná, at'ahá kǒ tǎ kui kichase nimahá xi nkú ts'ín tǎjt'a éhen Ntíaná:

Kui nga xínyahana kjuachánkahǐ ajǎhin xuta xi tǎjǎntu asuntee, kǒ séhe nga ts'intsoho.

¹⁰Kǒ b'a tǎ ts'ín tǎjt'a ya:

Jun xuta xi tintsuǒo asuntee, n'etsjokǒo xutáha Ntíaná.

¹¹Kǒ b'a tǎ tǎtsu sa:

N'etsjohǒo Ntíaná ngayjee xuta xi tǎjǎntu asuntee.

Chanink'o Ntíaná ngayjee xuta naxinantá xi tǎjǎn.

¹²Kǒ b'a tǎ ts'ín y'ét'a nda profeta Isaiá:

Stjúkjá nda xi kama kjamahá Isai,

nda xi kjuatǎxumahá xuta xi tǎjǎntu asuntee,

kui kama 'yún tak'un xuta.

¹³Ntíaná xi tíma 'yún tak'aán, kui xi kats'íntsejǎnyje animanuu kjuatsjo kǒ kjuajyu, jun xi s'ejnnuu Ntíaná. Katsjá nga'yúnnuu Espiritu Santo tu xi tu nku ndǎhá kjuinchǎjǎhinu ni xi tǎchuyóhǒo.

B'ǐ ts'ín tsakúya Pablo nk'ie nga kui nku nda postru xi ts'ínxǎjǎhin xuta xi najmi ntje judio tjeheh ra

¹⁴Behe k'an, já nts'e, nga kitsejǎhinuu kjuanda kǒ kjuankjǎnk'un, tu xi kama k'uaǐ niyáha ruu xinkiu. ¹⁵Tunga tǎjǎhín ni xi tíma k'an tǎb'et'á xujunnuu ei tu xi najmi n'echayahanu. At'ahá Ntíaná kitsjána kjuanda xu'bi ¹⁶nga an xi ts'inxát'ahá Cristo Jesu ngandahá xuta xi najmi ntje judio tjeheh ra. Tǎb'enijmǎhi én nda tsuhu Ntíaná xuta xi najmi ntje judio tjeheh ra tu xi kjuichú maha chje xi tsjohǒ Ntíaná, chje xi tǎts'ín tsje Espiritu Santo.

¹⁷Tsjo mana nga nchjanijmǎya xá xi kitsjána Cristo Jesu nga ts'inxát'ahá Ntíaná. ¹⁸At'ahá najmi ma k'an nchja ni xi kǎ'á, tu nkuhú xi nkú ts'ín ts'ínchjǎnna Cristo tu xi kjuint'éléhen ra Ntíaná xuta xi najmi ntje judio tjeheh ra. Cristo ts'ínchjǎn ntána kǒ xána ¹⁹kǒ nkjǎn tǎkjá kjuankjún xi bakúchji nga'yúhun. Nga'yúhun Espiritu Santo b'a tǎts'ún. B'a ts'ín jehena nga y'enijmǎ éh nda tsuhu Cristo nanki Jerusalen kǒ santaha má nga 'mi Ilirico.

²⁰Y'enijmía én nda tsuhu Cristo ante má nga najmi kjee ch'a b'énijmíhi. B'a kits'ian at'aha najmi kama mjena y'esún saha xá xi kik'atuts'ihin xuta xi kj'ái. ²¹Tu sa ní títs'ian xi nkú ts'ín tjt'a éhen Ntíaná:

Xi najmi kjee 'miyaha yáha kui, kui xi skuehe.
Ko xi najmi kjee nt'é yáha kui, kui xi kamankjihin.

B'i ts'ín kitsúya Pablo nk'ie nga mjehe nguaisehe xuta ninku Roma

²²Nkjin niyá najmi kisakú niyána nga kama kfinsehenuu, ²³tunga nd'ai ja kama ndjuúna xá xi títs'ian ante xi tjín ei ko ta ja tjihin nú nga mjena kfínsenuu. ²⁴Kui nga mjehena nga skuenuu nk'ie nga kfían España, at'aha mjena yo kfian. Tsjo kamana nga kúatejñajinnuu chuba nistjin. Nk'ie nga kj'ua yo, tšinkonú nga ts'inndjaá niyána.

²⁵Tunga nd'ai nanki Jerusalem tífia. Xuta xi kikj'áts'e Ntíaná kfiinsinka yo. ²⁶At'aha ngayjehe k'un xuta ninku xi tjín ante Macedonia ko ante Akaya incha kits'ínsun toon tu xi ts'ínkj'ihí ra xuta x'an xi kikj'áts'e Ntíaná xi tjíntu Jerusalem. ²⁷Tsjo kamaha nga b'a incha kits'ín. Ko kjuaxi nga tjeheh ts'e xuta xu'bo. At'aha nd'ai títs'ínkj'áihin xuta xi najmi ntje judio tjeheh ra ni xi ts'e Ntíaná, ni xi Ntíaná kitsjáha xuta xi ntje judio tjeheh ra. Kui nga xi najmi ntje judio tjeheh ra tjihin nga kuasinkoho nga kuakjányako xuta xi ntje judio tjeheh ra ni xi tjihin ei asuntei. ²⁸Kui b'a maha, nk'ie nga ja kama ndjuúhuna xá xu'bi ko nk'ie nga ja ts'inkjas'en ni xi kama ñjakúy, as'áihí ní kfían España ko kj'ua má nga tintsu'bo. ²⁹Be nga Cristo tu xí ndahá ts'ínkoná nk'ie nga kama ñjakáa.

³⁰Jun já nts'e, ngat'aha Nda Ntíaná Jesucristo ko ngat'aha kjuatjo xi tsjáná Espiritu Santo t'bankinuu nga chubantjainú nginkun Ntíaná. B'a ts'ín n'ekohonú nga'yún. ³¹Tinchíhuu nga najmi tu kasatéjña xuta xi najmi s'ejihin Nda Ntíaná xi tjíntu ante Judea. Ko ta tinchíhuu nga xuta xi kikj'áts'e Ntíaná xi tjíntu nanki Jerusalem nda ts'ín ts'ínkj'áihin ni xi kfínkoho. ³²B'a ts'ín tsjo tjihinna nga kuichusenuu ko ts'ínkj'áiya ichí kutju ajinnuu. B'a katuma tsa b'a ts'ín mjehe Ntíaná. ³³Ntíaná xi tsjáná kjuajyu kat'ejñajinnuu ngatentoo. B'a katuma.

B'i ts'ín kikjaniñaha Pablo xuta ninku xi tjíntu Roma

16 Be na nichjaá Febe. Ninku xi tjín nanki Cencrea ts'ínxát'a. ²Ngat'aha Nda Ntíaná nda n'ekjóhoón xi nkú ts'ín tjihin nga n'eé ñá xi xutaha Ntíaná mahaná. Tšinkoo nga tjohoon tu mí nihí ni xi machjéhen. At'aha nkjin nkjún xuta tsasinko ko ta tsasinkona.

³Tjohoon kjuasuniñana Priscila ko Akila, xi ta títs'ínxát'aha Cristo Jesu xi nkúhu an. ⁴Najmi incha kitsankjún tsa kuayá ngat'ana.

Títsjahá máb'achjihí ngat'ahá ni xi incha kits'ín. Najmi tu nku an xi b'a tíxian. B'a ta tíncha tsu ngayjee xuta ninku xi najmi ntje judio tjehe ra.

⁵Tjohoon kjuasuniñana xuta ninku xi ma ñjakú ni'yaha Priscila ko Akila. Tjohoon kjuasuniñana Epeneto. 'Yún tjona ndo. Ajihin xuta xi tjin ante Asia, kui xi tjun kis'ejihin Cristo. ⁶Tjohoon kjuasuniñana Maria. 'Yún tse xá xi kits'ín ajinnuu. ⁷Tjohoon kjuasuniñana Androniko ko Junias, xi ta ntje judio tjehe ra. Ta kis'eya'yúnka nubayá jóo. Ta já postruhú jóo ko yankjún. Kui tjun kis'ejihin Cristo nga an.

⁸Tjohoon kjuasuniñana Ampliato. 'Yún tjona ndo at'ahá ta s'ejihin Nda Ntiana. ⁹Tjohoon kjuasuniñana Urbano, kui xi nkúhu jin ta Cristo títs'inxát'ahá. Tjohoon kjuasuniñana Estakis. 'Yún tjona ndo. ¹⁰Tjohoon kjuasuniñana Apeles, xi ja tsakúchji nga 'yún s'ejihin Cristo. Tjohoon kjuasuniñana xuta xinkjin Aristobulo.

¹¹Tjohoon kjuasuniñana Herodion, xi ta ntje judio tjehe ra. Tjohoon kjuasuniñana xuta xinkjin Narciso, xi ta s'ejihin Nda Ntiana. ¹²Tjohoon kjuasuniñana Trifena ko Trifosa, xi ta títs'inxát'ahá Nda Ntiana. Tjohoon kjuasuniñana Persida, xi 'yún tjona ko xi 'yún tse xá xi kits'ín at'ahá Nda Ntiana tjenki.

¹³Tjohoon kjuasuniñana Rufo, xi Nda Ntiana j'ájihin, ko naaha, xi ta ko an basehe xi nkúhu tsa naana maha. ¹⁴Tjohoon kjuasuniñana Asinkrito ko Flegonte ko Hermes ko Patrobas ko Hermas ko já nts'eé xi tjintujihin. ¹⁵Tjohoon kjuasuniñana Filologo ko Julia ko Nereo ko na nichja ko Olimpás ko ngayjee xutaha Ntiana xi tjintujihin.

¹⁶B'i ngján súniñoohoo xinkiu. Títs'ínkjinuu kjuasuniña ngayjee xuta ninku xi ts'e Cristo.

¹⁷Jun já nts'e, t'bankinuu nga chúhuun yjonuu xi bakjanya xuta ko xi ts'innjajihin xuta. Kui xi fi kontraha ni xi ja tsinchiyó. N'e t'axihuun yjonuu xuta xu'bo. ¹⁸At'ahá xi b'a títs'ín najmi títs'inxát'ahá Nda Ntiana Jesucristo. Ni xi tsjo níhi tíncha bangisjai. Én sin én nda nchja nga b'anachaha xuta xi najmi kjee 'yún mankjihin ni xi ts'e Ntiana.

¹⁹Ya tu má xi tjehe ni nga tínu'yá'ón. Kui nga tsjo mahana ngat'a ts'ajun ko mjena nga 'yún kamankjin sanuu ni xi nda ko nga kuankín t'axihuun ni xi najmi ndoo. ²⁰Ntiana xi tsjáná kjuajyu, kui xi ts'ín nga n'e nganohó ndanindoo. Kas'enuu kjuandaha Nda Ntiana Jesucristo.

²¹Timoteo títs'ínkjinuu kjuasuniña. Kui xi tjenkona nga t'n'exát'aihi Jesucristo. Ta títs'ínkjinuu kjuasuniña Lucio ko Jason ko Sosipater, xi ta ntje judio tjehe ra.

²²Ko ta an Tercio xi títs'inntá xi nkú ts'ín títsuyana Pablo, títs'ínkjinuu kjuasuniña, an xi ta s'ejinna Nda Ntiana.

²³Gayo tĩts'ĩnkjinuu kjuasuniña. Ni'yaha tĩjĩña. Yo má nga ma ñjakú ngayjee xuta nĩnku. Ko ta tĩts'ĩnkjinuu kjuasuniña Erasto, xi tĩjĩhĩn xá nga f'átjo toohon xuta nantio, ko ta nda nts'eé Cuarto.

²⁴Kjuandaha Nda Ntĩaná Jesucristo kat'ejñajinnuu ngatento. B'a katuma.

B'ĩ ts'ĩn kits'ĩnkje Pablo xujun

²⁵Kan'etsjoho Ntĩaná. Kui xi kamaha nga ndjá ts'ĩnkinchánuu xi nkú ts'ĩn tĩjĩña én nda tsuhũ Jesucristo xi tĩxinya ko tĩb'enijmía. Tĩs'ejña chji nd'ái ni xi kis'ejña 'ma nkúhu nú chá ján. ²⁶Ja tĩs'ejña chji niĩ xi nkú nga tĩtsu xujuhun já profeta ko tĩn'ekint'é ngayjee xuta xi tĩjĩn asuntee. B'a kitsú Ntĩaná xi tĩjĩña tĩk'un sín nga b'a n'e tu xi s'ejĩhĩn ra ko kuĩnt'é'éhen ra ngayjee xuta.

²⁷Ngat'aha Jesucristo kas'ejña chji síhin kjuachánkaha Ntĩa, kui xi nku tutuu ko xi nkjink'uun. B'a katuma.